

北
史

三一



列傳第八十三

北史九十五

蠻獠

林邑

赤土

真臘

婆利

蠻之種類蓋盤瓠之後在江淮之間部落滋蔓布於數州東連壽春西通巴蜀北接汝潁往往有焉其於魏氏不甚爲患至晉之末稍以繁昌漸爲寇暴矣自劉石亂後諸蠻無所忌憚故其族漸得北遷陸渾以南滿於山谷宛洛蕭

條略爲丘墟矣道武既定中山聲教被于河表泰常八年蠻王梅安率渠帥數千朝京師求留質子以表忠款始光中拜安侍子豹爲安遠將軍江州刺史順陽公興光中蠻王文武龍請降詔褒慰之拜南雍州刺史魯陽侯延興中大陽蠻首桓誕擁河水以北渚葉以南八萬餘落遣使內屬孝文嘉之拜誕征南將軍東荊州刺史襄陽王聽自選郡縣誕字天生桓玄之子也初玄西奔至枚迴洲被殺誕時年數歲流竄大陽蠻中遂習其俗及長多智謀爲群蠻所歸誕旣內屬居朗陵太和四年王師南伐誕請爲前驅乃授使持節南征西道大都督討義陽不果而還十年移

居潁陽十六年依例降王爲公十七年加征南將軍中道大都督征竟陵遇遷洛師停是時齊征虜將軍直閣將軍蠻首田益宗率部曲四千餘戶內屬襄陽首雷婆思等十人率戶千餘內徙求居大和川詔給廩食後開南陽令有沔北之地蠻人安堵不爲寇賊十八年誕入朝賞遇隆厚卒謚曰剛子暉字道進位龍驤將軍東荊州刺史襲爵景明初大陽蠻首田育丘等二萬八千戶內附詔置四郡十八縣暉卒贈冠軍將軍三年魯陽蠻魯北驚等聚衆攻逼頻詔左衛將軍李崇討平之徙萬餘家於河北諸州及六鎮尋叛南走所在追討比及河殺之皆盡四年東荊州

蠻樊素安反僭帝號正始元年素安弟秀安復反李崇陽
大眼悉討平之二年梁沔東太守田清喜擁七郡三十一
縣戶萬九千遣使內附乞師討梁其雍州以東石城以西
五百餘里水陸援路請率部曲斷之四年梁永寧太守文
雲生六部自漢東遣使歸附永寧初東荊州表太守桓叔
興前後招慰大陽蠻歸附者一萬七百戶請置郡十六縣
五十詔前鎮東府長史酈道元檢行置之然興即暉弟也
延昌元年拜南荊州刺史居安昌縣於東荊三年梁遣兵
討江沔破掠諸蠻百姓填以動蠻自相督率二萬餘人頻請
統帥蠻以爲聲勢叔興公糾統并威儀爲之節度蠻人遂安

其年梁雍州刺史蕭藻遣其將蔡令孫等三將寇南荆之西南公襄沔上下破掠諸蠻蠻首梁龍驤將軍樊石廉叛梁來請援叔興遣與石廉督集蠻夏二萬餘人擊走之斬令孫等三將藻又遣其新陽太守邵道林於沔水之南石城東北立清水戍爲抄掠之基叔興遣諸蠻擊破之四年叔興上表請不隸東荆許之梁人每有寇抄叔興必摧破之正光中叔興擁所部南叛蠻首成龍強率戶數千內附拜刺史蠻帥田牛生率戶二千內徙揚州拜爲郡守梁義州刺史邊城王文僧明鐵騎將軍邊城太守田官德等率戶萬餘舉州內屬拜僧明平南將軍西豫州刺史封開封

侯官德龍驤將軍義州刺史自餘封授各有差僧明官德
竝入朝蠻出山至邊城建安者八九千戶義州尋爲梁將
裴邃所陷梁定州刺史田超秀亦遣使求附請援歷年朝
廷恐輕致邊役未之許會超秀死其部曲相率內附徙之
六鎮秦隴所在反叛二荆西郢蠻大擾動斷三鵠路殺都
督寇盜至於襄城汝水百姓多被其害梁遣將圍廣陵楚
城諸蠻竝爲前驅自汝水以南恣其暴掠連年攻討散而
復合其暴滋甚又有冉氏向氏田氏者取落尤盛餘則大
者萬家小者千戶更相崇僭稱王侯屯據三峽斷遏水路
荆蜀行人至有假道者周文略定伊瀍聲教南被諸蠻畏

威靡然向風矣大統五年蔡陽蠻王魯超明內屬授南雍
州刺史仍世襲焉十一年蠻酋梅勒特來貢其方物尋而
蠻帥田杜青和及江漢諸蠻擾動大將軍楊忠擊破之其
後蠻帥杜青和自稱巴州刺史入附朝廷因其所稱而授
之杜青和後遂反攻圍東梁州其唐州蠻田魯嘉亦叛自
號豫州伯王雄權景宣等前後討平之廢帝初蠻首樊舍
舉落內附以爲督淮北三州諸軍事淮州刺史淮安郡公
于謹等平江陵諸蠻騷動詔豆盧寧蔡祐等討破之恭帝
二年蠻酋宜人王田興彥北荊州刺史梅季昌等相繼歿
附以興彥季昌並爲開府儀同三司加季昌洛州刺史賜

爵石臺縣公其後巴蜀西人譙淹扇動群蠻以附梁蠻帥
向鎮侯向白虎等應之向五子王又攻陷信州田烏度田
唐等抄斷江路文子榮復據荊州之政陽郡自稱仁州刺
史并隣州刺史蒲微亦舉兵逆命詔田弘賀若敦潘和李
遷哲等討破之周武成初文州蠻叛州軍討定之尋而冉
令賢向五子王等又攻陷白帝殺開府楊長華遂相率作
亂前後遣開府元契趙剛等撫兵出討雖頗翦其族類而
元惡未除天和元年詔開府陸騰督王亮司馬裔等討之
騰水陸俱進次于湯口先遣喻之而令賢方增浚城池嚴
設扞禦遣其長子西黎次子南王領其支屬於江南險要

之地置立十城遠結沔陽蠻爲其聲援令賢率其卒固守
水邏城騰乃總集將帥謀進趣咸欲先取水邏然後經略
江南騰言於衆曰令賢內恃水邏金湯之險外託沔陽輔
車之援兼復資糧充實器械精新以我懸軍攻其嚴壘脫
一戰不剋更成其氣不如頻軍湯口先取江南翦其毛羽
然後遊軍水邏此制勝之計也衆皆然之乃遣開府王亮
率衆渡江旬日攻拔其八城凶黨奔散獲賊帥冉承公并
生口三千人降其部衆一千戶遂簡募驍勇數道分攻水
邏路經石壁城險峻四面壁立故以名焉唯有一小路緣
梯而上蠻蜚以爲峭絕非兵衆所行騰被甲先登衆軍繼

進備經危阻累日乃得舊路且騰先任隆州摠管雅知其路蠻帥冉伯犁冉安西與令賢有隙騰乃招誘伯犁等結爲父子又多遺錢帛伯犁等悅遂爲鄉導水邏側又有石勝城者亦是險要令賢使其兄龍真據之騰又密告龍真云若平水邏使其代令賢處之龍真大悅遣其子詣騰乃厚加禮接賜以金帛蠻貪利旣深仍請立效乃謂騰曰欲翻所據城恐人力寡少騰許以三百兵助之旣而遣二十人銜枚夜進龍真力不能禦遂平石勝城晨至水邏蠻衆大潰斬首萬餘級令賢遁走而獲之司馬裔又別下其二十餘城獲蠻帥并三公等騰乃積其骸骨於水邏城側爲

京觀後蠻望見輒大哭自此狼戾之心輟矣時向五子
王據石墨城令其子寶勝據雙城水邏平後頻遣喻之而
五子王猶不從命騰又遣王亮屯牢坪司馬裔屯雙城以
圖之騰慮雙城孤峭攻未可拔賊若委城遁散又難追討
乃令諸軍周迴立柵遏其走路賊乃大駭於是縱兵擊破
之禽五子王於石墨獲寶勝於雙城悉斬諸向首領生禽
萬餘口信州舊居白帝騰更於劉備故宮城南八陳之北
臨江岸築城移置信州又以巫縣信陵秭歸並築城置防
以爲襟帶焉天和六年蠻渠井祖意井龍驤又反詔大將
軍趙闇討平之自此群蠻懼息不復爲寇

獠者蓋南蠻之別種自漢中達于邛笮川洞之間所在皆有種類甚多散居山谷略無氏族之別又無名字所生男女唯以長幼次第呼之其丈夫稱阿暮阿段婦人阿夷阿等之類皆語之次第稱謂也依樹積禾以居其上名曰干闌干闌大小隨其家口之數往往推一長者爲王亦不能遠相統攝父死則子繼若中國之貴族也獠王各有鼓角一雙使其子弟自吹擊之好相殺害多死不敢遠行能臥水底持刀刺魚其口嚼食竝鼻飲死者豎棺而埋之性同禽獸至於忿怒父子不相避唯手有兵刃者先殺之若殺其父走避外求得一狗以謝不復嫌恨若報怨相攻擊必

殺而食之平常劫掠賣取諸狗而已親戚比隣指授相賣
被賣者號哭不服逃竄避之乃將買人指捕逐若亡叛獲
便縛之但經被縛者即服爲賤隸不敢稱良矣亡失兒女
一哭便止不復追思唯執楯持矛不識弓矢用竹爲簞群
聚鼓之以爲音節能爲細布色至鮮淨大狗一頭買一生
口其俗畏鬼神尤尚淫祀所殺之人美鬢髯者乃剥其面
皮籠之於竹及燥號之曰鬼鼓舞祀之以求福利至有賣
其昆季妻孥盡者乃自賣以供祭焉鑄銅爲器大口寬腹
名曰銅釁既薄且輕易於熟食建國中李勢在蜀諸僚始
出巴西渠川廣漢陽安資中攻破郡國爲益州大患勢內

外受敵所以亡也自桓溫破蜀之後力不能制又蜀人東流山險之地多空獠遂挾山傍谷與夏人參居者頗輸租賦在深山者仍不爲編戶梁益二州歲伐獠以裨潤公私頗藉爲利正始中夏侯道遷舉漢中內附宣武遣尚書邢巒爲梁益二州刺史以鎮之近夏人者安堵樂業在山谷者不敢爲寇後以羊祉爲梁州傅豎眼爲益州祉性酷虐不得物情梁輔國將軍范季旭與獠王趙清荆率衆屯孝子谷祉遣統軍魏胡擊走之後梁寧朔將軍姜白復擁夷獠入屯南城梁州人王法慶與之通謀衆屯於固門川祉遣征虜將軍討破之豎眼施恩布信大得獠和後以元法

僧代傳豎眼爲益州法僧在任貪殘獠遂反叛勾引梁兵圍逼晉壽朝廷憂之以豎眼先得物情復令乘傳往撫獠聞豎眼至莫不欣然拜迎道路於是而定及元桓元子真相繼爲梁州竝無德績諸獠苦之軍後朝廷以梁益二州控攝嶮遠乃立巴州以統諸獠後以巴酋嚴始欣爲刺史又立隆城鎮所緡獠二十萬戶彼謂北獠歲輸租布又與外人交通貿易巴州生獠竝皆不順其諸頭王每於時節謁見刺史而已孝昌初諸獠以始欣貪暴相率反叛攻圍巴州山南行臺勉喻即時散罷自是獠諸頭王相率詣行臺者相繼子建厚勞賚之始欣見中國多事又失彼心慮

獲罪譴時梁南梁州刺史陰子春扇惑邊陲始欣謀將南
叛始欣族子愷時爲隆城鎮將密知之嚴設邏候遂禽梁
使人并封始欣詔書鐵券刀劍衣冠之屬表送行臺子建
乃啓以鎮爲南梁州愷爲刺史發使執始欣囚於南鄭遇
子建見代梁州刺史傅豎眼仍爲行臺豎眼久病其子敬
紹納始欣重賂使得還州始欣乃起衆攻愷屠滅之據城
南叛梁將蕭玢率衆援接時梁益二州竝遣將討之攻陷
巴州執始欣遂大破玢軍及斬玢以傳曇表爲刺史後元
羅在梁州爲所陷自此遂絕及周文平梁益之後令在所
撫慰其與華人雜居者亦頗從賦役然天性暴亂旋致擾

動每歲命隨近州鎮出兵討之獲其生口以充賤隸謂之爲堅獠焉後有商旅往來者亦資以爲貨公卿達于庶民之家有獠口者多矣恭帝三年陵州木籠獠反詔開府陸騰討破之周保定二年鐵山獠又反抄斷江路陸騰又攻拔其三城天和三年梁州桓稜獠叛總管長史趙文表討之軍次巴州文表欲率衆徑進軍吏等曰此獠旅拒日久部衆甚強討之者四面攻之以分其勢今若大軍直進不遣奇兵恐併力於表未可制勝文表曰往者旣不能制之今須別爲進趣若四面遣兵則獠降走路絕理當相率以死拒戰如從一道則吾得示威恩分遣人以理曉諭爲惡

者討之歸善者撫之善惡既分易爲經略事有變通奈何
欲遵前轍也文表遂以此意遍令軍中時有從軍熟獠多
與相稜親識即以實報之相稜獠相與聚議猶豫之間文
表軍已至其界獠中先有二路一路稍平一路極險俄有生
獠酋帥數人來見文表曰我恐官軍不識山川請爲鄉導
文表謂之曰此路寬平不須導引卿但先去好慰喻子弟
也乃遣之文表謂其衆曰向者獠帥謂吾從寬路而行必
當設伏險要若從嶮路出其不慮獠衆自離散矣於是勒
兵從險道進其有不通之處即平之乘高而望果見其伏
兵獠既失計爭携妻子退保險要文表頓軍大蓬山下示禍

福遂相率來降文表皆撫慰之仍徵其租稅無敢動者後
除文表爲蓬州刺史又大得人和建德初李暉爲蓬梁州
掾管諸獠亦望風從附然其種滋蔓保據巖壑依山走險
若履平地雖屢加兵弗可窮討性又無知殆同禽獸諸夷
之中最難以道招懷者也

林邑其先所出事具南史其國延袤數千里土多香木金
寶物產大抵與交趾同以磚爲城蜃灰塗之東向戶尊官
有二其一曰西那婆帝其二曰薩婆地歌其官三等其一
曰倫多姓次歌倫致帝次乙地伽蘭外官分爲二百餘部
其長官曰弗羅次曰可輪如牧宰之差也王戴金花冠形

如章甫衣朝霞布珠璣纓絡足躡革履時服錦袍良家子
侍衛者二百許人皆執金裝兵有弓箭刀槊以竹爲弩傳
毒於矢樂有琴笛琵琶五絃頗與中國同每擊鼓以警衆
吹豳以即戎其人深目高鼻髮拳色黑俗皆徒跣以幅巾
纏身冬月衣袍婦人推髻施柳葉席每有婚媾令媒者齎
金銀釧酒三壺魚數頭至女家於是擇日夫家會親賓歌
舞相對女家請一婆羅門送女至男家壻盥手因牽女授
之王死七日而葬有官者三日庶人一日皆以函盛屍鼓
舞導從輿至外次積薪焚之收其餘骨王則內金甕中沉
之於海有官者以銅甕沉之海口庶人以瓦送之於江男

女皆截髮哭至水次盡哀而止歸則不哭每七日燃香散
花復哭盡哀而止百日三年皆如之人皆奉佛文字同於
天竺隋文帝既平陳乃遣使獻方物後朝貢遂絕時天下
無事群臣言林邑多奇寶者仁壽末上遣大將軍劉方爲
驩州道行軍總管率欽州刺史審長真驩州刺史李暉開
府秦雄步騎萬餘及犯罪者數千人擊之其王梵志乘巨
象而戰方軍不利方乃多掘小坑草覆其上因以兵挑之
方與戰僞北梵志逐之其象陷軍遂亂方大破之遂棄城
走入其郡獲其廟主十八枚皆鑄金爲之蓋其國有十八
世方班師梵志復其故地遣使謝罪於是朝貢不絕

赤土國扶南之別種也在南海中水行百餘日而達所都土色多赤因以爲號東波羅剌國西婆羅娑國南訶羅旦國北拒大海地方數千里其王姓瞿曇氏名利富多塞不知有國近遠稱其父釋王位出家爲道傳位於利富多塞在位十六年矣有三妻竝鄰國女也居僧祇城有門三重相去各百許步每門圖畫菩薩飛仙之象懸金花鈴眊婦人數十人或奏樂或捧金花又飾四婦人容飾如佛塔邊金剛力士之狀夾門而立門外者持兵仗門內者執白拂夾道垂素網綴花王宮諸屋悉是重閣北戶北面而坐三重之榻衣朝霞布冠金花冠垂雜寶纓絡四女子立侍左

右兵衛百餘人主榻後作一木龕以金銀五香木雜鈿之
龕後懸一金光焰夾榻又樹二金鏡鏡前竝陳金甕甕前
各有金香爐當前置一金伏牛前樹一寶蓋左右皆有寶
扇婆羅門等數百人東西重行相向而坐其官薩陀加
邏一人陀拏達叉一人迦利密迦三人共掌政事俱羅末
帝一人掌刑法每城置卮邪迦一人鉢帝十人其俗皆穿
耳翦髮無跪拜之禮以香油塗身其俗敬佛尤重婆羅門
婦人作髻於項後男女通以朝霞朝雲雜色布爲衣豪富
之室恣意華靡唯金鑠非王賜不得服用每嫁婚擇吉日
女家先期五日作樂飲酒父執女手以授壻七日乃配既

娶即分財別居唯少子與父居父母兄弟死則剔髮素服
就水上構竹木爲棚棚內積薪以屍置上燒香建幡吹蠡
擊鼓以送火焚薪遂落於水貴賤皆同唯國王燒訖收灰
貯以金瓶藏於廟屋冬夏常溫雨多霽少種植無時特宜
稻稭白豆黑麻自餘物產多同於交趾以甘蔗作酒雜以
紫瓜根酒色黃赤味亦香美亦以椰漿爲酒隋煬帝嗣位
募能通絕域者大業三年屯田主事常駿虞部主事王君
政等請使赤土帝大悅遣齎物五千段以賜赤土王其年
十月駿等自南海郡乘舟晝夜二旬每日遇便風至焦石
山而過東南諸陵伽鉢拔多洲西與林邑相對上神祠焉

又南行至師子石自是島嶼連接又行二三日西望見狼牙湏國之山於是南達雞籠島至於赤土之界其王遣婆羅門鳩摩羅以舶三百艘來迎吹蠡擊鼓樂隋使至金鎖以纜船月餘至其都王遣其子那邪迦請與駿等禮見先遣人送金盤貯香花并鏡鑷金台二枚貯香油金瓶二枚貯香水白疊布四條以擬供使者盥洗其日未時那邪迦又將象二頭持孔雀蓋以迎使人并致金盤金花以藉詔函男女百人奏蠡鼓婆羅門二人導路至王宮駿等奉詔書上閤王以下皆坐宣詔訖引駿等坐奏天竺樂事畢駿等還館又遣婆羅門就館送食以草葉爲盤其大方丈因

謂駿曰今是大國臣非復赤土國矣後數日請駿等入宴儀衛導從如初見之禮王前設兩床床上竝設草葉盤芳一丈五尺上有黃白紫赤四色之餅牛羊魚鼈猪螭蜃之肉百餘品延駿升床從者於地席各以金鍾置酒女樂迭奏禮遺甚厚尋遣邢弼隨貢方物并獻金芙蓉冠龍腦香以鑄金爲多羅葉隱起成文以爲表金函封之令婆羅門以香花奏蟲鼓而送之旣入海見綠魚群飛水上浮海十餘日至林邑東南竝山而行其海水色黃氣腥舟行一日不絕云是大魚糞也循海北岸達于交趾駿以六年春與邢弼迦於弘農謁帝帝大悅授駿等執戟都尉邢弼迦

等官賞各有差

真臘國在林邑西南本扶南之屬國也去日南郡舟行六十日而至南接車渠國西有朱江國其王姓利氏名質多斯那自其祖漸已強盛至質多斯那遂兼扶南而有之死子伊奢那先代立居伊奢那城郭下二萬餘家城中有一大堂是其王聽政所總大城三十所城有數千家各有部師官名與林邑同其王三日一聽朝坐五香七寶床上施寶帳以文木爲竿象牙金鈿爲壁狀如小屋懸金光焰有同于赤土前有金香命二人侍側王著朝霞古貝璚絡腰腹下垂至脛頭戴金寶花冠被真珠纓絡足履革屣耳懸

金鑑常服白疊以象牙爲矯若露髮則不加纓絡臣下服制大抵相類有五大臣一曰孤落支二曰相高憑三曰婆何多陵四曰舍摩陵五曰髯羅婁及諸小臣朝於王者輒於階下三稽首王呼上階則跪以兩手抱膊遶王環坐議政事訖跪伏而去階庭門閣侍衛有千餘人被甲持仗其國與參平朱江二國和親數與林邑阇桓二國戰爭其人行止皆持甲仗若有征伐因而用之其俗非王正妻子不得爲嗣王初立日所有兄弟竝刑殘之或去一指或劓其鼻別處供給不得任進人形小而色黑婦人亦有白者悉拳髮垂耳性氣捷勁居處器物頗類赤土以右手爲淨左

手爲穢每旦澡洗以楊枝淨齒讀誦經呪又澡洒乃食食
罷還用楊枝淨齒又讀經呪飲食多蘇酪沙糖杭粟米餅
欲食之時先取雜肉羹與餅相和手擣而食娶妻者唯送
女人女擇日遣媒人迎婦男女二家各八日不出晝夜燃
燈不息男婚禮畢即與父母分財別居父母死小兒未婚
者以餘財與之若婚畢財物入官喪葬兒女皆七日不食
剔髮而喪僧尼道士親故皆來聚會音樂送之以五香木
燒尸收灰以金銀瓶盛送大水之內貧者或用瓦而以五
綠色畫之亦有不焚送屍山中任野獸食者其國北多山
阜南有水澤地氣尤熱無霜雪饒瘴癘毒蠱宜梁稻少黍

粟果菜與日南九真相類異者有婆羅那娑樹無花葉似柿實似冬瓜菴羅花葉似棗實似李毗野樹花似木瓜葉似杏實似楮婆田羅樹花葉實並似棗而小異歌畢佗樹花似林檎葉似榆而厚大實似李其大如升自餘多同九真海有魚名建同四足無鱗鼻如象吸水上噴高五六十尺有浮胡魚形似鮠背如鸚鵡有八足多大魚半身出望之如山每五六月中毒氣流行即以白脂白牛羊於城西門外祠之不然五穀不登畜多死人疾疫近都有陵伽鉢婆山上有神祠每以兵二千人守衛之城東神名婆多利祭用人肉其王年別殺人以夜祠禱亦有守衛者千人其

敬鬼如此多奉佛法尤信道士佛及道士竝立像於其館
隋大業十二年遣使貢獻帝禮之甚厚於後亦絕

婆利國自交趾浮海南過赤土丹丹乃至其國國界東西
四月行南北四十五日行王姓刹利邪伽名護濫那婆官
曰獨訶邪拏次曰獨訶氏拏國人善投輪其大如鏡中有
竅外鋒如鋸遠以投人無不中其餘兵器與中國略同俗
類真臘物產同於林邑其殺人及盜截其手姦者鑕其足
期年而止祭祀必以月晦盤貯酒肴淨之流水每十一月
必設大祭海出珊瑚有鳥名舍利解人語隋大業十二年
遣使朝貢後遂絕于時南荒有丹丹盤盤二國亦來貢方

物其風俗物產大抵相類云

論曰禮云南方曰蠻有不火食者矣然其種類非一與華人錯居其流曰蠻曰獠曰俚曰僚曰仡居無君長隨山洞而居其俗斷髮文身好相攻討自秦并三楚漢平百越地窮丹徼景極日南水陸可居咸爲郡縣洎乎境分南北割據各殊蠻獠之族遞爲去就至於林邑赤土真臘婆利則地隔江嶺莫通中國及隋氏受命剋平九宇煬帝纂業威加八荒甘心遠夷志求珍異故師出流求兵加林邑威振殊俗過於秦漢遠矣雖有荒外之功無救域中之敗傳曰非聖人外寧必有內憂誠哉斯言也大業中南荒朝貢者

十餘國其事迹湮滅今可知者四國而已

列傳第八十三

北史九十五

列傳第八十四

北史九十六

氐

吐谷渾

宕昌

鄧至

白蘭

党項

附國

稽胡

氏者四夷之別種號曰白馬三代之際蓋自有君長而世

一朝見故詩稱自彼氐羗莫敢不來王也秦漢以來世居岐隴以南漢川以西自立豪帥漢武帝遣中郎將郭昌衛廣滅之以其地爲武都自汧渭抵於巴蜀種類寔繁或謂之白氐或謂之故氐各有侯王受中國封拜漢建安中有楊騰者爲部落大帥騰勇健多計略始徙居仇池方百頃爲號四面斗絕高七里餘蟠道三十六回其上有豐水泉煮土成鹽騰後有名千萬者魏拜爲百頃氐王千萬孫名飛龍漸強盛晉帝假平西將軍無子養外甥令狐茂搜爲子惠帝元康中茂搜自號輔國將軍右賢王群氐推以爲主關中土人流移者多依之愍帝以爲驃騎將軍左賢王

戎搜死子難敵統位與弟堅頭分部曲難敵自號左賢王
屯下辨堅頭號右賢王屯河池難敵死子毅立自號使持
節龍驤將軍左賢王下辨公以堅頭子盤爲使持節冠軍
將軍右賢王河池公臣晉晉以毅爲征南將軍三年毅族
兄初襲殺毅并有其衆自立爲仇池公臣於石季龍後稱
蕃於晉永和十年改初爲天水公十一年毅小弟宋奴使
姑子梁三王因侍直手刃殺初初子國率左右誅三王及
宋奴復自立爲仇池公桓溫表國爲秦州刺史國子安爲
武都太守十二年國從叔俊復殺國自立國子安叛苻生
殺俊復稱蕃於晉死子世自立爲仇池公晉太和三年以

世爲秦州刺史弟統爲武都太守世死統廢世子纂自立
一名德聚纂黨襲殺統自立爲仇池公遣使詣簡文帝以
纂爲秦州刺史晉咸安元年苻堅遣楊安伐纂剋之徙其
人於關中空百頃之地宋奴之死二子佛奴佛狗逃奔苻
堅堅以女妻佛奴子定拜爲尚書領軍苻堅之敗關右擾
亂定盡力於堅堅死乃率衆奔隴右徙居歷城去仇池百
二十里置倉儲於百頃招夷夏得千餘家自稱龍驤將軍
仇池公稱蕃於晉孝武卽以其自號假之後以爲秦州刺
史登國四年遂有秦州之地號隴西王後爲乞佛乾歸所
殺無子佛狗子盛先爲監國守仇池乃統事自號征西將

軍秦州刺史仇池公謚定爲武王分諸氏羗爲二十部護
軍各爲鎮戍不置郡縣遂有漢中之地仍稱蕃于晉天興
初遣使朝貢詔以盛爲征南大將軍仇池王隔礙姚興不
得歲通貢使盛以兄子撫爲平南將軍梁州刺史守漢中
宋永初中宋武帝封盛爲武都王盛死私謚曰惠文王子
玄統位玄子黃眉號征西大將軍開府儀同三司秦州刺
史武都王雖蕃於宋仍奉晉永熙之號後始用宋元嘉正
朔初盛謂玄曰吾年已老當終爲晉臣汝善事宋帝故玄
奉焉玄善於待士爲流舊所懷始光四年太武遣大鴻臚
公孫軌拜玄爲征南大將軍督梁州刺史南秦王玄上表

請比內蕃許之玄死私謚孝昭王子保宗統位初玄臨終謂弟難當曰今境候未寧方須撫慰保宗冲昧吾授卿國事其無隊先勲難當固辭請立保宗以輔之保宗既立難當妻姚氏謂難當曰國嶮宜立長君反事孺子非久計難當從之廢保宗而自立稱蕃于宋難當拜保宗爲鎮南將軍鎮石昌以次子順爲鎮東將軍秦州刺史守上邽保宗謀襲難當事泄被繫先是四方流人以仇池豐實多往依附流人有許穆之郝惔之人投難當立改姓爲司馬穆之自云名飛龍惔之自云名康之云是晉室近戚康之尋爲人所殺時宋梁州刺史甄法護刑政不理宋文帝遣刺

史蕭思話代任難當以思話未至遣將舉兵襲梁州破白馬遂有漢中之地尋而思話使其司馬蕭道成先驅進討所向克捷遂平梁州因又附宋難當後釋保宗遣鎮薰亭保宗與兄顯歸京師太武拜保宗征南大將軍秦州牧武都王尚公主保顯爲鎮西將軍晉壽公後遣大鴻臚崔頤拜難當爲征南大將軍儀同三司領護西羌校尉秦梁二州牧南秦王難當後自立爲大秦王號年曰建義立妻爲王后世子爲太子置百官具擬天朝然猶貢獻于宋不絕尋而其國大旱多災異降大秦王復爲武都王太延初難當立鎮上邽太武遣車騎大將軍樂平王丕等督河西高

平諸軍取上邽又詔喻難當奉詔攝守尋而傾國南寇規有蜀土襲宋益州攻涪城又伐巴西獲維州流人七千餘家還于仇池宋文帝怒遣將裴方明等伐之難當爲方明所敗棄仇池與千餘騎奔上邽太武遣中山王辰迎之赴行宮方明旣尅仇池以保宗弟保熾守之河間公齊擊走之先是詔保宗鎮上邽又詔鎮駱谷復其本國保宗弟文德先逃氐中乃說保宗令叛事泄齊執保宗送京師詔難當殺之氐羗立文德屯于濁水文德自號征西將軍秦河梁三州牧仇池公求援於宋封文德爲武都王遣偏將房亮之等助之齊逆擊禽亮之文德奔守葭蘆武都陰平氐

多歸之詔淮陽公皮豹子等率諸軍討文德走漢中收其
妻子寮屬資糧及保宗妻公主送京師賜死初公主勸保
宗反人問曰背父母之邦若何公主曰禮婦人外成因夫
而榮事立據守一方我亦一國之母豈比小縣之主以此
得罪文成時拜難當營州刺史還爲外都大官卒謚曰忠
子和隨父歸魏別賜爵仇池公子德子襲難當爵早卒子
小眼襲例降爲公拜天水太守卒子大眼別有傳小眼子
公熙襲爵正光中尚書右丞張普惠爲行臺送租於南秦
東益普惠啓公熙俱行至南秦以氏反不得進遣公熙先
慰氏東益州刺史魏子建以公熙嶮薄密令訪察公熙果

有潛謀將爲叛亂子建仍報普惠令其攝錄普惠急追公
熙公熙竟不肯赴東出漢中普惠表列其事公熙大行賄
賂終得免罪後爲假節別將與都督元志同守岐州爲秦
賊莫折天生所虜死於秦州文德後自漢中入統汧隴遂
有陰平武興之地後爲宋荊州刺史劉義宣所殺保宗之
執也子元和奔宋以爲武都白水太守元和據城歸順文
成嘉之拜征南大將軍武都王內徙京師元和從叔僧嗣
復自稱武王於葭蘆僧嗣死從弟文度自立爲武興王遣
使歸順獻文授文度武興鎮將旣而復叛孝文初征西將
軍皮歡喜攻葭蘆破之斬文度首文度弟玃小名鼠名犯

獻文廟諱以小名稱鼠自爲武興王遣使奉表謝罪貢其
方物孝文納之鼠遣子狗奴入侍拜鼠都督南秦州刺史
征西將軍西戎校尉武都王鼠死從子後起統位孝文復
以鼠爵授之鼠子集始爲白水太守後起死以集始爲征
西將軍武都王集始復朝于京師拜都督南秦州刺史安
南大將軍領護南蠻校尉漢中郡侯武興王賜以車旗戎
馬錦綵繒纁尋還武興進號鎮南將軍加督寧湘五州諸
軍事後仇池鎮將楊靈珍襲破武興集始遂入齊景明初
集始來降還授爵位歸守武興死子紹先立拜都督南秦
州刺史征虜將軍漢中郡公武興王贈集始車騎大將軍

開府儀同三司謚安王紹先年幼委事二叔集起集義夏侯道遷以漢中歸順也梁白馬戍主尹天保率衆圍之道遷求援於集起集義二人貪保邊蕃不欲救之唯集始弟集朗心願立功率衆破天保全漢川朗之力也集義見梁益既定恐武興不得久爲外藩遂扇動諸氏推紹先僭稱大號集起集義竝稱王外引梁爲援安西將軍邢巒遣建武將軍傅豎眼攻武興尅之執紹先送于京師遂滅其國以爲武興鎮復改鎮爲東益州前後鎮將唐法樂刺史杜纂邢豹以威惠失衆氏豪仇石柱等相率反叛朝廷以西南爲憂正光中詔魏子建爲刺史以恩信招撫風化大行

遠近欵附如內地焉後唐永代子建爲州未幾氏人悉反
永棄城東走自此復爲氏地魏末天下亂紹先奔還武興
復自立爲王周文定秦隴紹先稱藩送妻子爲質大統元
年紹先請其女妻周文奏魏帝許之紹先死子辟邪立四
年南岐州氏苻壽反攻陷武都自號太白王詔大都督侯
莫陳順與渭州刺史長孫澄討降之九年清水氏酋李鼠
仁據地作亂氏帥梁道顯叛攻南由周文遣典籤趙昶慰
諭之鼠仁等相繼歸附十一年於武興置東益州以辟邪
爲刺史十五年安夷氏復叛趙昶時爲郡守收首逆者二
十餘人斬之乃定於是以昶行南秦州事氏帥蓋開等作

亂開據北谷其黨西結宕昌羌獠甘共推蓋開爲主和分
道遣使宣示禍福然後出兵討之禽蓋開散其餘黨與州
叛氐復侵逼南岐州刺史叱羅協遣使告急昶起救又大
破之先是氐酋楊法深據陰平自稱王亦盛之苗裔也魏
孝昌中舉衆內附自是職貢不絕廢帝元年以深爲黎州
刺史二年楊辟邪據州反群氐復與同逆詔叱羅協與趙
昶討平之周文乃以大將軍宇文貴爲大都督與州刺史
貴威名先著群氐頗畏服之來歲楊法深從尉遲迴平蜀
軍迴法深尋與其宗人楊崇集楊陳佗各擁其衆遞相攻
討趙昶時督成武沙三州諸軍事遣使和解之法深等從

命乃分其部落更置州郡以處之恭帝末武興氏反圍和
州鳳州固道氏魏天王等亦聚衆響應大將軍豆盧寧等
討之周明帝時興州人段叱及下辨栢樹二縣人反相率
破蘭臯戍氏酋姜多復率厨中氏屬攻陷落聚郡以應之
趙昶討平二縣并斬段叱而陰平護盧氏復往叱聚與厨
中相應昶乃簡精騎出其不意徑入厨中至大竹坪連破
七柵誅其渠帥二郡竝降及昶還厨中生氏復爲寇掠昶
又遣儀同劉崇義字文琦入厨中討之於是群氏竝平及
王謙舉兵沙氏帥開府楊永安又據州應謙大將軍達奚
儒討平之

吐谷渾本遼東鮮卑徒河涉歸子也涉歸一名奔洛韓有二子庶長曰吐谷渾少曰若洛廐涉歸死若洛廐代統部落是爲慕容氏涉歸之在也分戶七百以給吐谷渾與若洛廐二部馬鬪相傷若洛廐怒遣人謂吐谷渾曰先公廐分與兄異部何不相遠而馬鬪相傷吐谷渾曰馬食草飲水春氣發動所以鬪鬪在馬而怒及人乖別甚易今當去汝萬里外若洛廐悔遣舊老及長史七人樓謝之吐谷渾曰我乃祖以來樹德遼右先公之世卜筮之言云有二子當享福祚竝流子孫我是卑庶理無竝大今以馬致怒殆天所啓諸君試驅馬令東馬若還東我當隨去即令從騎

擁馬令迴數百步欻然悲鳴突走而西聲若頽山如是者
十餘輩一迴一迷樓力屈乃跪曰可汗此非復人事渾謂
其部落曰我兄弟子孫竝應昌盛鹿當傳子及曾玄孫其
間可百餘年我乃玄孫間始當顯耳於是遂西附陰山後
假道上隴若洛鹿追思吐谷渾作阿于歌徒河以兄爲阿
于也子孫僭號以此歌爲輦後鼓吹大曲吐谷渾遂從上
隴止於枹罕自枹罕暨甘松南界昂城龍涸從洮水西南
極白蘭數千里中逐水草廬帳而居以肉酪爲糧西北諸
雜種謂之阿柴虜吐谷渾死有子六十人長子吐延身長
七尺八寸勇力過人性刻暴爲昂城羗酋姜聰所刺劒猶

在體呼子葉延語其大將絕拔湓曰吾氣絕棺斂訖便速去保蘭地既嶮遠又土俗懦弱易控禦葉延小兒欲授餘人恐倉卒終不能相制今以葉延付汝竭股肱之力以輔之孺子得立吾無恨也抽劒而死有子十二人葉延少而勇果年十歲縛草爲人號曰姜聰每旦輒射之射中則嗥叫泣涕其母曰讎賊諸將已屠膾之汝年小何煩朝朝自苦葉延嗚咽若不自勝荅母曰誠知無益然罔極之心不勝其痛性至孝母病母三日不食葉延亦不食頗視書傳自謂曾祖弈洛韓始封昌黎公吾爲公孫之子案禮公孫之子得以王父字爲氏遂以吐谷渾爲氏焉葉延死子碎

奚立性淳謹三弟專權碎奚不能制諸大將共誅之奚憂
哀不復攝事遂立子視連爲世子委之事號曰莫賀郎華
言父也奚遂以憂死視連立以父憂思不遊娛酣宴十五
年死弟視罷立死子樹洛干等竝幼弟烏紇提立而妻樹
洛干母生二子慕瓚利延烏紇提一名大孩死樹洛干立
自號車騎將軍是歲晉義熙初也樹洛干死弟阿豺立自
號驃騎將軍沙州刺史部內有黃沙周迴數百里不生草
木因號沙州阿豺兼并氐羌地方數千里號爲強國昇西
強山觀墊江源問於羣寮曰此水東流更有何名由何郡
國入何水也其長史曾和曰此水經仇池過晉壽出宕渠

始號墊江至巴郡入江度廣陵入於海阿豺曰水尚知歸
吾雖塞表小國而獨無所歸乎遣使通宋獻其方物宋少
帝封爲澆河公未及拜受宋文帝元嘉三年又加除命又
將遣使朝貢會暴病臨死召諸子弟告之曰先公車騎捨
其子虔以大業屬吾豈敢忘先公之舉而私於緯代其以
慕瓚繼事阿豺有子二十人緯代長子也阿豺又謂曰汝
等各奉吾一隻箭將玩之地下俄而命母弟慕利延曰汝
取一隻箭折之慕利延折之曰汝取十九隻箭折之慕延
不能折阿豺曰汝曹知不單者易折衆則難摧戮力一心
然後社稷可固言終而死慕瓚立先是阿豺時宋會竟未

至而死慕瓚又奉表通宋文帝又授隴西公慕瓚招集秦涼亡業之人及羌戎雜夷衆至五六百落南通蜀漢北交涼州赫連部衆轉盛太武時慕瓚始遣其侍郎謝太寧奉表歸魏尋討禽赫連定送之京師太武嘉之遣使者策拜慕瓚爲大將軍西秦王慕瓚表曰臣誠庸弱敢竭精款俘禽僭逆獻捷王府爵秩雖崇而土不增廓車旗旣飾而財不周賞願垂鑒察亮其單款臣湏接寇逆疆境之人爲賊所抄流轉東下今皇化混一求還鄉土乞佛曰連窟略寒張華等三人家弱在此分垂可愍願并敕遣使恩洽遐荒存亡感戴太武詔公卿朝堂會議答施行太尉長孫嵩

及議郎博士二百七十九人議曰前者有司所處以爲秦
王荒外之君本非政教所及來則受之去則不禁皇威遠
被西秦王慕義畏威稱臣納貢求受爵號議者以爲古者
要荒之君雖人土衆廣而爵不擬華夏陛下加寵王官乃
越常分容飾車旗班同上國至於繒絮多少舊典所無皆
當臨時以制豐寡自漢魏以來撫綏遐荒頗有故事呂后
遺單于御車二乘馬二駟單于荅馬千匹其後匈奴和親
敵國遺繒絮不過數百呼韓邪稱臣身自入朝始乃至萬
匹今西秦王若以土無桑蠶便當上請不得言財不周賞
也周室衰微齊侯小白一匡天下有賜胙之命無益土之

賞晉侯重耳破楚城濮唯受南陽之田爲朝宿之邑西秦
所致唯定而已塞外之人因時乘便侵入秦涼未有經略
拓境之勲爵登上國統秦涼河沙四州之地而云土不增
廓比聖朝於弱周而自同於五霸無厭之情其可極乎西
秦王忠款於朝廷原其本情必不至此或左右不救因致
斯累檢西秦流入賊時所抄悉在薄坂今旣稱藩四海咸
秦天下一家可救秦州送詣京師隨後遣還所請乞佛三
人昔爲賓國之使來在王庭國破家遷即爲臣妾可勿聽
許制曰公卿議之未爲失體西秦王所收金城枹罕隴西
之地彼自取之朕即與之便是裂土何須復廓西秦款至

縣綃隨使踈數增益之非一匹而已自是慕瓚貢獻頗簡
又通于宋宋文封爲隴西王太延二年慕瓚死弟慕利延
立詔遣使者策謚慕瓚曰惠王後拜慕利延鎮西大將軍
儀同三司改封西平王以慕瓚子元緒爲撫軍將軍時慕
利延又通宋宋封爲河南王太武征涼州慕利延懼遂率
其部人西遁沙漠太武以慕利延兄有禽赫連定之功遣
使宣喻之乃還後慕利延遣使表謝書奏乃下詔褒獎之
慕利延兄子緯代懼慕利延害已與使者謀欲自歸慕利
延覺而殺之緯代弟叱力延等八人逃歸京師請兵討慕
利延太武拜叱力延歸義王詔晉王伏羅率諸將討之軍

至大母橋慕利延兄子拾寅走河西伏羅遣將追擊之斬首五千餘級慕利延走白蘭慕利延從弟伏念長史鷄鳩黎部大崇娥等率衆一萬三千落歸降後復遣征西將軍高梁王彤等討之於白蘭慕利延遂入于闐國殺其王死者數萬人南征罽賓遣使通宋求援獻烏丸帽女國金酒器胡王金釧等物宋文帝賜以牽車七年遂還舊土慕利延死樹洛干子拾寅立始邑於伏羅川其居止出入竊擬王者拾寅奉脩貢職受魏正朔又受宋封爵號河南王太武遣使拜爲鎮西大將軍沙州刺史西平王後拾寅自恃嶮遠頗不恭命通使于宋獻善馬四角羊宋明帝加之官

號文成時定陽侯曹安表拾寅今保白蘭多有金銀牛馬
若擊之可以大獲議者咸以先帝忿拾寅兄弟不睦使晉
王伏羅高涼王邠再征之竟無多剋拾寅雖復遠遁軍亦
疲勞今在白蘭不犯王塞不爲人患非國家之所急也若
遣使招慰必求爲臣妾可不勞而定也王者之於四荒羈
縻而已何必屠其國有其地安曰臣昔爲澆河戍將與之
相近明其意勢若分軍出其左右拾寅必走保南山不過
十日牛馬草盡人無所食衆必潰叛可一舉而定也從之
詔陽平王新成建安王穆六頭等出南道南郡公李惠給
事中公孫拔及安出北道以討之拾寅走南山諸軍濟河

追之時軍多病諸將議賊已遠遁軍容已振今驅疲病之卒要難冀之功不亦過乎衆以爲然乃引還獲駝馬二十餘萬獻文復詔上黨王長孫觀等率州郡兵討拾寅軍至曼頭山拾寅來逆戰觀等縱兵擊敗之拾寅宵遁於是思悔復蕃職遣別駕康盤龍奉表朝貢獻文幽之不報其使拾寅部落大饑屢寇澆河詔平西將軍廣川公皮歡喜率敦煌州枹罕高平將軍爲前鋒司空上黨王長孫觀爲大都督以討觀等軍入拾寅境芻其秋稼拾寅窘怖遣子詣軍表求改過觀等以聞獻文以重勞將士乃下詔切責之徵其任子拾寅遣子斤入侍獻文尋遣斤還拾寅後復擾

掠邊人遣其將良利守洮陽抱罕所統也抱罕鎮將西郡
公楊鍾葵貽拾寅書以責之拾寅表曰奉詔聽臣還舊土
故遣良利守洮陽若不追前恩求令洮陽貢其土物辭旨
懇切獻文許之自是歲脩職貢太和五年拾寅死子度易
侯立遣其侍郎時真貢方物提上表稱嗣事後度易侯伐
宕昌詔讓之賜錦綵一百二十匹喻令悔改所掠宕昌口累
部送時還易侯竝奉詔死子伏連籌立孝文欲令入朝
表稱疾病輒脩洮陽塗和城而置戍焉文明太后崩使人
告凶伏連籌拜命不禁有司請伐之孝文不許羣臣以其
受詔不敬不宜納所獻帝曰拜受失禮乃可加以詰責所

獻土毛乃是臣之常道杜棄所獻便是絕之縱欲改悔其
路無由矣詔曰朕在哀疚之中未存征討而去春枹罕表
取其洮陽湟和二戎時此旣邊將之常即便聽許及偏師
致討二戎望風請降執訊二千餘人又得婦女九百口子
婦可悉還之伏連乃遣世子賀魯頭朝于京師禮錫有加
拜伏連籌使持節都督西垂諸軍事征西將軍領護西戎
中郎將西海郡開國公吐谷渾王麾旗章授之飾皆備給
之後遣兼負外散騎常侍張禮使於伏連籌謂禮曰昔與
宕昌通和恒見稱大王已有自名今忽名僕而拘執此使
將命偏師往問其意禮曰君與宕昌竝爲魏蕃而比輒有

興動殊違臣節當發之日宰輔以爲君若返迷知罪則剋
保蕃業脫守愚不改則禍難將至伏連籌遂嘿然及孝文
崩遣使赴哀盡其誠敬伏連籌內脩職貢外并戎狄塞表
之中號爲強富准擬天朝樹置官司稱制諸國以自誇大
宣武初詔責之曰梁州表送卿報宕昌梁彌邕與卿竝爲
邊附語其國則隣藩論其位則同列而稱書爲表名報爲
旨有司以國常刑殷勤請討朕慮險遠多虞輕相構惑故
先宣此意善自三思伏連籌上表自申辭誠懇至終宣武
世至于正光犂牛蜀馬及西南之珍無歲不至後秦州城
人莫折念生反河西路絕涼州城人萬于菩提等東應念

生囚刺史宋穎穎密遣求援於伏連籌伏連籌親率大衆救之遂獲保全自爾以後關徼不通貢獻遂絕伏連籌死子夸呂立始自號爲可汗居伏俟城在青海西十五里雖有城郭而不居恒處穹廬隨水草畜牧其地東西三千里南北千餘里官有王公僕射尚書及郎中將軍之號夸呂椎髻眊珠以皂爲帽坐金獅子牀號其妻爲母尊衣織成裙披錦大袍辮髮於後首戴金花冠其俗大丈夫衣服略同於華夏多以羅幕爲冠亦以繒爲帽婦人皆貫珠貝束髮以多爲貴兵器有弓刀甲稍國無常賦須則稅富室商人以充用焉其刑罰殺人及盜馬死餘則徵物以贖罪亦

量事決杖刑人必以氈蒙頭持石從高擊之父兄死妻後
母及嫂等與突厥俗同至于婚貧不能備財者輒盜女去
死者亦皆埋殯其服制葬訖則除之性貪婪忍於殺害好
射獵以肉酪爲糧亦有種田有大麥粟豆然其北界氣候
多寒唯得蕪菁大麥故其俗貧多富少青海周回千餘里
海內有小山每冬冰合後以良牝馬置此山至來春收之
馬皆有孕所生得駒號爲龍種必多駿異吐谷渾嘗得波
斯草馬放入海因生驄駒能日行千里世傳青海驄者也
土出犛牛馬驢多鸚鵡饒銅鐵朱砂地兼鄯善且末興和
中齊神武作相招懷荒遠蠕蠕旣附於國今呂遣使致敬

神武喻以大義徵其朝貢夸呂乃遣使人趙吐骨真假道
蠕蠕頻來東魏又薦其從妹靜帝納以爲嬪遣貢外散騎
常侍傅靈擿使於其國夸呂又請婚乃以濟南王匡孫女
爲廣樂公主以妻之此後朝貢不絕 西魏大統初周文遣

儀同潘濬喻以逆順之理於是夸呂再遣使獻能舞馬及
羊牛等然寇抄不已緣邊多被其害廢帝二年周文勒大
兵至姑臧夸呂震懼使貢方物是歲夸呂又通使於齊涼
州刺史史寧覘知其還襲之於州西赤泉獲其僕射伏
觸狀將軍翟潘密商胡二百四十人駝騾六百頭雜綵絲
絹以萬計恭帝三年史寧又與突厥木杆可汗襲擊夸呂

破之虜其妻子獲珍物及雜畜武成初夸呂復寇涼州刺史是云寶戰沒賀蘭祥宇文貴率兵討之夸呂遣其廣定王鍾留王拒戰祥等破之廣定等遁走又拔其洮陽洪和二城置洮州而還保定中夸呂前後三輩遣使獻方物天和初其龍涸王莫昌率來降以其地爲扶州二年五月復遣使來獻建德五年其國大亂武帝詔皇太子征之軍至伏俟城夸呂遁走虜其餘衆而還明年又再遣使奉獻宣政初其趙王他婁屯來降自是朝獻遂絕及隋開皇初侵弘州地曠人梗廢之遣上柱國元諧率步騎數萬擊之賊悉發國中自曼頭至樹敦甲騎不絕其所署河西揔管定

城王鍾利房及其太子可博汗前後來拒戰諧頻破之夸
呂大懼率親兵遠遁其名王十三人召率部落而降上以
其高寧王移茲裒素得衆心拜大將軍封河南王以統降
衆自餘官賞各有差未幾復來寇邊州刺史皮子信拒戰
死之汶州摠管梁遠以銳卒擊之乃奔退俄而入寇廓州
州兵擊走之夸呂在位百年屢因喜怒廢殺太子其後太
子懼殺遂謀執夸呂而降請兵於邊吏秦州摠管河間王
計應之上不許太子謀泄爲其父所殺復立少子嵬王訶
爲太子疊州刺史杜蔡請因其豐討之上又不許六年嵬
王訶復懼父誅謀歸國請兵迎接上謂其使者曰溥天之

下皆是朕臣妾各爲善事即朕稱心嵬王既有好意欲來
投服唯教嵬王爲臣子法不可遠遣兵馬助爲惡事嵬王
乃止八年其名王拓拔木彌請以千餘家歸化上曰叛天
背父何可收納又其本意正自避死若今違拒又復不仁
若有音信宜遣慰撫任其自拔不須出兵馬應接其妹夫
及甥欲來亦任其意不勞勸誘也是歲河南王移茲裒死
文帝令其弟樹歸龍統其衆平陳之後夸呂大懼逃遁險
遠不敢爲寇十一年夸呂卒子世伏使其兄子無素奉表
稱藩并獻方物請以女備後庭上謂無素曰若依來請他
國便當相學一許一塞是謂不平若竝許之又非好法竟

不許十一年遣刑部尚書宇文弼撫慰之十六年以光化
公主妻世伏上表稱公主爲天右上不許明年其國大亂
國人殺世伏立其弟允伏爲主使陳廢立事并謝專命罪
且請依俗尚主上從之自是朝貢歲至而常訪國家消息
上甚惡之煬帝即位伏允遣子順來朝時鐵勒犯塞帝遣
將軍馮孝慈出敦煌禦之戰不利鐵勒遣使謝罪請降帝
遣黃門侍郎裴矩慰撫之諷令擊吐谷渾以自效鐵勒即
勒兵襲破吐谷渾伏允東走保西平境帝復令觀德王雄
出澆河許公宇文述出西平掩之大破其衆伏允遁逃於
山谷間其故地皆空自西平臨羌城以西且末以東祁連

以南雪山以北東西四千里南北二千里皆爲隋有置郡縣鎮戍發天下輕罪徙居之於是留順不之遣伏允無以自資率其徒數千騎客於党項帝立順爲主送出玉門令統餘衆以其大寶王泥洛周爲輔至西平其部下殺洛周順不果入而還大業末天下亂伏允復其故地屢寇河右郡縣不能制吐谷渾北有乙弗勿敵國國有屈海海周迴千餘里衆有萬落風俗與吐谷渾同然不識五穀唯食魚及蘇子蘇子狀若中國枸杞子或赤或黑有契翰一部風俗亦同特多狼白蘭山西北又有可蘭國風俗亦同目不識五色耳不聞五聲是夷蠻戎狄之中醜類也土無所出

直大養群畜而戶落亦可萬餘人頑弱不知關戰忽見異人舉國便走性如野獸體輕工走逐不可得白蘭西南二千五百里隔大嶺又度四十里海有女王國人庶萬餘落風俗土著宜桑麻熟五穀以女爲王故因號焉譯使不至其傳云然

宕昌羗者其先蓋三苗之胤周時與庸蜀微盧等八國從武王滅商漢有先零燒當等世爲邊患其地東接中華西通西域南北數千里姓別自爲部落酋帥皆有地分不相統攝宕昌即其一也俗皆土著居有屋宇其屋織犂牛尾及羖羊毛覆之國無法令又無徭賦唯戰伐之時乃相屯

聚不然則各事生業不相往來皆衣裘褐收養犂牛羊豕以供其食父子伯叔兄弟死者即以繼母世叔母及嫂弟婦等爲妻俗無文字但候草木榮落記其歲時三年一相聚殺牛羊以祭天有梁勲者世爲酋帥得羌豪心乃自稱王焉勲孫彌忽太武初遣子彌黃奉表求內附太武嘉之遣使拜彌忽爲宕昌王賜彌黃爵甘松侯彌忽死孫彪子立其地自仇池以西東西千里瀋水以南南北八百里地多山阜人二萬餘落世脩職貢頗爲吐谷渾所斷絕彪子死彌治立彪子弟羊子先奔吐谷渾遣兵送羊子欲奪彌治位彌治遣使請救獻文詔武都鎮將宇文生救之羊子

退走彌治死子彌機立遣其司馬利柱奉表貢方物楊文
度之叛圍武都彌機遣其二兄率衆救武都破走文度孝
文時遣使子橋表貢朱沙雌黃白石膽各一百斤自此後
歲以爲常朝貢相繼後孝文遣鵠臚劉歸謁者張察拜彌
機征南大將軍西戎校尉梁益三州牧河南公宕昌王以
助之周文命章武公遵率兵送之

鄧至者白水羌也世爲羌豪因地名號自稱鄧至其地自
亭街以東平武以西汶嶺以北宕昌以南土風習俗亦與
宕昌同其王像舒治遣使內附高祖拜龍驤將軍鄧至王
遣貢不絕鄧至之西有赫羊國初其部內有一羊形甚大

色至鮮赤故因爲國名又有東亭衛大赤水寒宕石河薄陵下習山倉驤覃水等諸羌國風俗麤獷與鄧至國不同焉亦時遣貢使朝廷納之皆假之以雜號將軍子男渠帥之名

白蘭者羌之別種也其地東北接吐谷渾西北利模徒南界鄯鄂風俗物產與宕昌略同周保定元年遣使獻犀甲鐵鎧

党項羌者三苗之後也其種有宕昌白狼皆自稱獼猴種東接臨洮西平西拒葉護南北數千里處山谷間每姓別爲部落大者五千餘騎小者千餘騎織犂牛尾及牯羴毛

爲屋服裘褐披氈爲上飾俗尚武力無法令各爲生業有
戰陣則屯聚無徭役不相往來養犂牛羊賭以供食不知
稼穡其俗淫穢薰報於諸夷中爲甚無文字但候草木以
記歲時三年一聚會殺牛羊以祭天人年八十以上死者
以爲令終親戚不哭少死者則云夭枉共悲哭之有琵琶
橫吹擊缶爲節魏周之際數來擾邊隋文帝爲丞相時中
原多故因此大爲寇掠蔣公梁睿旣平王謙請因還師討
之開皇元年有千餘家歸化五年拓拔寧叢等各率衆詣
旭州內附授大將軍其部下各有等差十六年復寇會州
詔發隴西兵討之大破其衆人相率降遣子弟入謝罪帝

謂曰還語爾父兄人生須有定居養老長幼乃乍還乍走
不羞鄉里邪自是朝貢不絕

附國者蜀郡西北二千餘里即漢之西南夷也有嘉良夷
即其部所居種姓自相率領土俗與附國同言語少殊不
統一其人竝無姓氏附國王字宜繒其國南北八百里東
西千五百里無城柵近川谷傍山險俗好復讎故壘石爲
礮以避其患其礮高至十餘丈下至五六丈每級以木隔
之基方三四步礮上方二三步狀似浮圖於下致級開小
門從內上通夜必關閉以防賊盜國有重罪者罰牛人皆
輕捷便擊劒漆皮爲牟甲弓長六尺竹爲箭妻其群母及

嫂兒弟父兄亦納其妻好歌舞鼓簧吹長角有死者無服
制置屍高牀之上沐浴衣服以牟甲覆以獸皮子孫不哭
帶甲舞劒而呼云我父爲鬼所取我欲報冤殺鬼自餘親
戚哭三聲而止婦人哭必兩手掩面死家殺牛親屬以腊
酒相遺共飲噉而瘞之死後一年方始大葬必集親賓殺
馬動至數十匹立木爲祖父神而事之其俗以皮爲帽形
圓如鉢或戴羃離衣多駝皮裘全剥牛脚皮爲靴項繫鐵
鎖手貫鐵釧王與酋帥金爲首飾曾前縣一金花徑三寸
其土高氣候涼多風少雨宜小麥青稞山出金銀銅多白
雉水有嘉魚長四尺而鱗細大業四年其王遣使素福等

八人入朝明年又遣其弟子宜林率嘉良夷六十人朝貢
欲獻良馬以路險不通請開山道修職貢物煬帝以勞人
不許嘉良有水闊六七十丈附國有水闊百餘丈竝南流
用皮爲舟而濟附國有薄緣夷風俗亦同西有女國其東
北連山綿亘數千里接於党項徃徃有羌大小左封昔衛
葛延白狗向人望族林臺春桑利亘迷桑婢藥大硤白蘭
北利摸徒郝鄂當迷渠步桑悟千碛竝在深山窮谷無大
君長其風俗略同於党項或役屬吐谷渾或附國大業中
朝貢緣西南邊置諸道摠管以管之

稽胡一曰步落稽蓋匈奴別種劉元海五部之苗裔也或

云山戎赤狄之後自離石以西安定以東方七八百里居山谷間種落繁熾其俗土著亦知種田地少桑蠶多衣麻布其丈夫衣服及死亡殯葬與中夏略同婦人則多貫蜃貝以爲耳頸飾與華人錯居其渠帥頗識文字言語類夷狄因譯乃通蹲踞無禮貪而忍害俗好淫穢尤甚將嫁之夕方與淫者叙離夫氏聞之以多爲貴旣嫁頗亦防閑有犯姦者隨事懲罰又兄弟死者皆納其妻雖分統郡縣列於編戶然輕其徭賦有異華人山谷阻深者又未盡役屬而兇悍恃險數爲寇魏孝昌中有劉蠡升者居雲陽谷自稱天子立年號署百官屬魏氏亂力不能討蠡升遂分

遣部衆抄掠汾晉之間略無寧歲神武遷鄴後始密圖之
乃僞許以女妻蠡升太子蠡升遂遣子詣鄴齊神武厚禮
之緩以婚期蠡升既恃和親不爲之備魏大統元年三月
齊神武襲之蠡升率輕騎出外徵兵爲其北部王所殺送
於神武其衆復立蠡升第三子南海王爲主神武滅之獲
其僞主及弟西海王并皇后夫人王公以下四百餘人歸
於鄴居河西者多恃險不賓時周文方與神武爭衡未
遑經略乃遣黃門侍郎楊檮就安撫之五年黑水部衆先
叛七年別帥夏州刺史劉平伏又據上郡反自是北山諸
部連歲寇暴周文前後遣于謹侯莫陳崇李弼等相繼討

平之武成初延州稽胡郝阿保狼皮率其種人附於齊氏
阿保自置丞相狼皮自署柱國并與其別部劉桑德共爲
影響柱國豆盧寧督諸軍擊破之二年狼皮等餘黨復
叛詔大將軍韓果討破之保定中離石生胡數寇汾北數州
刺史韋孝寬於險要築城置兵糧以遏其路及楊忠與突
厥伐齊稽胡等便懷旅拒不供糧餽忠乃詐其酋帥云與
突厥迴兵討之酋帥等懼乃相率供饋焉其後丹州綏州
等部內諸胡與蒲州別帥郝協郎等又頻年逆命復詔達
奚震辛威于寔等前後窮討散其種落天和二年延州摠
管宇文盛率衆城銀州稽胡白郁久同喬是羅等欲邀襲

盛竝討斬之又破其別帥爲喬三勿同等五年開府劉雄
出綏州巡檢北邊川路稽胡帥白郎喬素勿同等度河逆
戰雄復破之建德五年武帝敗齊師於晉州乘勝逐北齊
人所棄甲仗未暇收歛稽胡乘間竊出竝盜而有之乃立
蠡升孫沒鐸爲主號聖武皇帝年曰石平六年武帝定東
夏將討之議欲窮其巢穴齊王憲以爲種類既多又山谷
阻絕王師一舉未可盡除且當翦其魁帥餘加慰撫帝然
之乃以憲爲行軍元帥督行軍摠管趙王招譙王儉滕王
道等討之憲軍次馬邑乃分道俱進沒鐸遣其黨天柱守
河東又遣其大帥穆支據河西規欲分守險要犄角憲軍

憲命譙王儉擊破之斬獲千餘級趙王招又禽沒鐸衆盡
降宣政元年汾胡帥劉受羅千覆瓜越王盛督諸軍討禽
之自是寇盜頗息

論曰氏羌吐谷渾等曰殊俗別處邊陲考之前代屢經叛
服窺覷首鼠蓋其本性夫無德則叛有道則伏先王所述
荒服也

列傳第八十四

北史九十六



列傳第八十五

北史九十七

西域

夏書稱西戎即序班固云就而序之非盛威武致其貢物也漢氏初開西域有三十六國其後分立五十五王置校尉都護以撫之王莽篡位西域遂絕至於後漢班超所通者五十餘國西至西海東西萬里皆來朝貢復置都護校尉以相統攝其後或絕或通漢朝以爲勞弊中國其官時置時廢豎魏晉之後互相吞滅不可復詳記焉道武初經營中原未暇及於四表旣而西戎之貢不至有司奏依漢氏故事請通西域可以振威德於荒外又可致奇貨於天

府帝曰漢氏不保境安人乃遠開西域使海內虛耗何利之有今若通之前弊復加百姓矣遂不從歷明元世竟不招納太延中魏德益以遠聞西域龜茲疏勒烏孫悅般渴槃陀鄯善焉耆軍師粟特諸國王始遣使來獻大武以西域漢世雖通有求則卑辭而來無欲則驕慢王命此其自知絕遠大兵不可至故也若報使往來終無所益欲不遣使有司奏九國不憚遐嶮遠貢方物當與其進安可豫抑後來乃從之於是始遣行人王恩生許綱等西使恩生出流沙爲蠕蠕所執竟不果達又遣散騎侍郎董琬高明等多賁錦帛出鄯善招撫九國厚賜之初琬等受詔便道之

國可往赴之琬過九國北行至烏孫國其王得魏賜拜受
甚悅謂琬等曰傳聞破洛那者古皆思魏德欲稱臣致貢
但患其路無由耳今使君等既到此可往二國副其慕仰
之誠琬於是自向破洛那遣使者烏孫王爲發導譯達二
國琬等宣詔慰賜之已而琬明東還烏孫破洛那之屬遣
使與琬俱來貢獻者十有六國自後相繼而來不間于歲
國使亦數十輩矣初太武每遣使西域常詔河西王沮渠
牧犍令護送至姑臧牧犍恒發使導路出於流沙後使者
自西域還至武威牧犍左右謂使者曰我君承蠕蠕吳提
妄說云去歲魏天子自來伐我士馬疲死大敗而還我擒

其長弟樂平王丕我君大喜宣言國中又聞吳提遣使告
西域諸國魏已削弱今天下唯我爲強若更有魏使勿復
恭奉西域諸國亦有貳且牧犍事主稍以慢隋使還具以
狀聞太武遂議討牧犍涼州旣平鄯善國以爲唇亡齒寒
自然之道也今武威爲魏所滅次及我矣若通其使人知
我國事取亡必近不如絕之可以支久及斷塞行路西域
貢獻歷年不入後平鄯善行人復通始琬等使還京師具
言凡所經見及傳聞傍國云西域自漢武時五十餘國後
稍相并至太延中爲十六國分其地爲四域自葱嶺以東
流沙以西爲一域葱嶺以西海曲以東爲一域者舌以南

月氏以北爲一域兩海之間水澤以南爲一域內諸小渠
長蓋以百數其出西域本有二道後更爲四出自玉門度
流沙西行二千里至鄯善爲一道自玉門度流沙北行二
千二百里至車師爲一道從莎車西行一百里至葱嶺葱
嶺西一千三百里至伽倍爲一道自莎車西南五百里葱
嶺西南一千三百里至波路爲一道焉自琬所不傳而更
有朝貢者紀其名不能具國俗也東西魏時中國方擾及
於齊周不聞有事西域故二代書並不立記錄隋開皇仁
壽之間尚未云經略煬帝時乃遣侍御史韋節司隸從事
杜行滿使於西蕃諸國至罽賓得瑪瑙盃王舍城得佛經

史國得十舞女師子皮火鼠毛而還帝復令聞嘉公裴矩
於武威張掖間往來以引致之其有君長者四十四國矩
因其使者入朝啗以厚利令其轉相諷諭大業中相率而
來朝者四十餘國帝因置西戎校尉以應接之尋屬中國
大亂朝貢遂絕然事亡失書所存錄者二十國焉魏時所
來者在隋亦有不至今摠而編次以備前書之西域傳云
至於道路遠近物產風俗詳諸前史或有不同斯皆錄其
當時蓋以備其遺闕爾

鄯善國都扞泥城古樓蘭國也去代七千六百里所都城
方一里地多沙鹵少水草北即白龍堆路至太延初始遣

其弟素延者入侍及太武平涼州沮渠牧犍弟無諱走保
燉煌無諱後謀渡流沙遣其弟安周擊鄯善王比龍恐懼
欲降會魏使者自天竺剽賔還俱會鄯善勸比龍拒之遂
與連戰安周不能剋退保東城後比龍懼率衆西奔且末
其世子乃應安周鄯善人頗剽劫之令不得通太武詔散
騎常侍成周公萬度歸乘傳發涼州兵討之度歸到燉煌
留輜重以輕騎五千渡流沙至其境時鄯善人衆布野度
歸勅吏卒不得有所侵掠邊守感之皆望旗稽服其王真
達面縛出降度歸釋其縛留軍屯守與真達詣京都太武
大悅厚待之是歲拜交趾公韓杖爲假節征西將軍領護

四百五十五
西戎校尉鄯善王以鎮之賦役其人比之郡縣

且末國都且末城在鄯善西去代八十三百二十里真君
三年鄯善王比龍避沮渠安周之難率國人之半奔且末
後役屬鄯善且末西北有流沙數百里夏日有熱風爲行
旅之患風之所至唯老駝預知之即噴而聚立埋其口鼻
於沙中人每以爲候亦即將氈擁蔽鼻口其風迅駛斯須
過盡若不防者必至危斃大統八年其兄鄯善米率衆內
附

于闐國在且末西北葱嶺之北二百餘里東去鄯善千五
百里南去女國二千里去朱俱波千里北去龜茲千四百

里去代九千八百里其地方亘千里連山相次所都城方
八九里部內有大城五小城數十于闐城東三十里有首
拔河中出玉石土宜五穀并桑麻山多美玉有好馬駝騾
其刑法殺人者死餘罪各隨輕重懲罰之自外風俗物產
與龜茲略同俗重佛法寺塔僧尼甚衆王尤信尚每設齋
日必親自灑掃饋食焉城南五十里有贊摩寺即昔羅漢
比丘盧旃爲其王造覆盆浮圖之所石上有辟支佛跏趺
雙跡猶存于闐西五百里有比摩寺云是老子化胡成佛
之所俗無禮義多盜賊淫縱自高昌以西諸國人等深目
高鼻唯此一國貌不甚胡頗類華夏城東二十里有大水

北流號樹枝水即黃河也一名計式水城西十五里亦有
大水名達利水與樹枝水會俱北流真君中太武詔高涼
王斛擊吐谷渾慕利延慕利延懼驅其部落渡流沙斛進
軍急追之慕利延遂西入于闐殺其王死者甚衆獻文末
蠕蠕寇于闐于闐患之遣使素目伽上表曰西方諸國今
皆已屬蠕蠕奴世奉大國至今無異今蠕蠕軍馬到城下
奴聚兵自固故遣使奉獻遙望救援帝詔公卿議之公卿
奏曰于闐去京師幾萬里蠕蠕之性唯習野掠不能攻城
若爲害當時已旋矣雖欲遣師勢無所及帝以公卿議示
其使者亦以爲然於是詔之曰朕承天理物欲令萬方各

安其所應勅諸軍以拯汝難但去汝遐阻政復遣援不救
當時之急是以停師不行汝宜知之朕今練甲養卒一二
歲間當躬率猛將為汝除患汝其謹警候以待大舉先是
朝廷遣使者韓羊皮使波斯波斯王遣使獻馴象及珍物
經于闐于闐中于王秋仁輒留之假言慮有寇不達羊皮
言狀帝怒又遣羊皮奉詔責讓之自後每使朝貢周建德
三年其王遣使獻名馬隋大業中頻使朝貢其王姓王字
早示門練錦帽金鼠冠妻戴金花其王髮不令人見俗言
若見王髮其年必俊云

蒲山國故皮山國也居皮城在于闐南去代一萬二千里

其國西南三里有凍凌山後役屬于聞

悉居半國故西夜國也一名子合其王號子治呼捷在于
聞西去代萬二千九百七十里太延初遣使來獻自後貢
使不絕

權於摩國故烏托國也其王居烏托城在悉居半西南去
代一萬二千九百七十里

渠莎國居故莎車城在子合西北去代一萬二千九百八
十里

車師國一名前部其王居交河城去代萬五十里其地北
接蠕蠕本通使交易太武初始遣使朝獻詔行人王恩生

許綱等出使恩生等始度流沙為蠕蠕所執恩生見蠕蠕
吳提持魏節不為之屈後太武切讓吳提吳提懼乃遣恩
生等歸許綱到燉煌病死朝廷壯其節賜諡曰貞初沮渠
無諱兄弟之渡流沙也鳩集遺人破車師國其君十一年
車師王車夷落遣使奉獻不空於歲天子降念賜遣甚厚
仰慕天子威德遣使奉獻不空於歲天子降念賜遣甚厚
及臣繼立亦不闕常貢天子垂矜亦不異前世敢緣至恩
輒陳私懇臣國自無諱所攻擊經今八歲人民飢荒無以
存活賊今攻臣甚急臣不能自全遂捨國東奔三分免一
即日已到焉耆東界思歸天闕幸垂賑救於是下詔撫慰

之開焉者倉給之正平初遣子入侍自後每使朝貢不絕
高昌者車師前王之故地漢之前部地也東西二百里南
北五百里四面多大山或云晉漢武遣兵西討師旅頓弊
其中尤困者因住焉地勢高敞人庶昌盛因名高昌亦云
其地有漢時高昌壘故以為國號東去長安四千九百里
漢西域長史及戊巳校尉並居於此晉以其地為高昌郡
張軌呂光沮渠蒙遜據河西皆置太守以統之去燉煌十
三日行國有八城皆有華人地多石磧氣候溫暖磧土良
沃穀麥一歲再熟宜蠶多五果人饒漆有草名羊刺其上
生蜜而味甚佳引水溉田出赤鹽其味甚美復有白鹽其

形如玉高昌人取以爲枕貢之中國多蒲桃酒俗事天神
兼信佛法國中羊馬牧在隱僻處以避寇非貴人不知其
處北有赤石山七十里山有貪汙山夏有積雪此山北鐵勒
界也太武時有闐爽者自爲高昌太守太延中遣散騎侍
郎王恩生等使高昌爲蠕蠕所執真君中爽爲沮渠無諱
所龍奪據之無諱死弟安周代立和平元年爲蠕蠕所并
蠕蠕以闐伯周爲高昌王其稱王自此始也太和初伯周
死子義成立歲餘爲從兄首歸所殺自立爲高昌王五年
高車王可至羅殺首歸兄弟以燉煌人張孟明爲王後爲
國人所殺立馬儒爲王以鞏顧禮麴嘉爲左右長史二十

一年遣司馬王體玄奉表朝貢請師逆接來舉國內徙孝文納之遣明威將軍韓安保率騎千餘赴之割伊吾五百里以儒居之至羊棣水儒遣嘉禮率步騎一千五百迎安保去高昌四百里而安保不至禮等還高昌安保亦還伊吾安保遣使韓興安等十二人使高昌儒復遣顧禮將其世子義舒迎安保至白棘城去高昌百六十里而高昌舊人情戀本土不願東遷相與殺儒而立麴嘉為王嘉字靈鳳金城榆中人既立又臣于蠕蠕那蓋顧禮與義舒隨安保至洛陽及蠕蠕主伏圖為高車所殺嘉又臣高車初前部胡人悉為高車所徙入於焉耆又為嚙唃所破滅國人

分散衆不自立請王於嘉嘉遣第二子爲焉耆王以主之
熙平元年嘉遣兄子私署左衛將軍田地太守孝亮朝京
師仍求內徙乞軍迎接於是遣龍驤將軍孟威發涼州兵
三千人迎至伊吾失期而反於後十餘遣使獻珠像白黑
貂裘名馬鹽枕等款誠備至唯賜優百卒不重迎三年嘉
遣使朝貢宣武又遣孟威使詔勞之延昌中以嘉爲持節
平西將軍瓜州刺史泰臨縣開國伯私署王如故熙平初
遣使朝獻詔曰卿地隔關山境接荒漠頻請朝接徙國內
遷雖來誠可嘉即於理未帖何者彼之毗庶是漢魏遺黎
自晉氏不綱因難播越成家立國世積已久惡徙重遷人

懷戀舊今若動之恐異同之變爰在肘腋不得便如來表也神龜元年冬孝亮復表求援內徙朝廷不許正光元年明帝遣假負外將軍趙義等使於嘉嘉朝貢不絕又遣使奉表自以邊遐不習典誥求借五經諸史并請國子助教劉燮以爲博士明帝許之嘉死贈鎮西將軍涼州刺史子堅立於後關中賊亂使命遂絕普泰初堅遣使朝貢除平西將軍瓜州刺史泰臨縣伯王如故又加衛將軍至永熙中特除儀同三司進爲郡公後遂隔絕至大統十四年詔以其卅子玄嘉爲王恭帝二年又以其田地公茂嗣位武成元年其王遣使獻方物保定初又遣使來貢其國周時

城有一十六 至隋時城有十八其都城周回一千八百四十步於坐室畫魯哀公問政於孔子之像官有令尹一人比中夏相國次有公二人皆王子也一爲交河公一爲田地公次有左右衛次有八長史曰吏部祠部庫部倉部主客禮部戶部兵部等長史也次有五將軍曰建武威遠陵江殿中伏波等將軍也次有八司馬長史之副也次有侍郎校郎主簿從事階位相次分掌諸事次有省事專掌導引其大事決之於王小事則世子及二公隨狀斷決評章錄記事訖即除籍書之外無父掌文案官人雖有列位並無書唯每早集於牙門評議衆事諸城各有戶曹水曹

田曹城遣司馬侍郎相監檢校名爲令服飾丈夫從胡法
婦人裙襦頭上作髻其風俗政令與華夏略同兵器有弓
箭刀楯甲稍文字亦同華夏兼用胡書有毛詩論語孝經
置學官弟子以相教授雖習讀之而皆爲胡語賦稅則計
田輸銀錢無者輸麻布其刑法風俗昏姻喪葬與華夏小
異而大同自燉煌向其國多沙磧茫然無有蹊徑欲往者
尋其人畜骸骨而去路中或聞歌哭聲行人尋之多致亡
失蓋魑魅魍魎也故商客往來多取伊吾路開皇十年突
厥破其四城有二千人來歸中國堅死子伯雅立其大母
本突厥可汗女其父死突厥令依其俗伯雅不從者父之

突厥逼之不得已而從煬帝即位引致諸蕃大業四年遣使貢獻帝待其使甚厚明年伯雅來朝因從擊高麗還尚宗室女華容公主八年冬歸蕃下令國中曰先者以國處邊荒境被髮左衽今大隋統御宇宙平一孤旣沐浴和風庶均大化其庶人以上皆宜解辮削衽帝聞而善之下詔曰光祿大夫弁國公高昌王伯雅本自諸蕃世祚西壤昔因多難翦爲胡服自我皇隋平一宇宙伯雅踰沙忘阻奉貢來庭削衽曳裾變夷從夏可賜衣冠仍班製造之式然伯雅先臣鐵勒恒遣重臣在高昌國有商胡往來者則稅之送于鐵勒雖有此令取悅中華然竟畏鐵勒不敢改也

自是歲令貢方物

且彌國都天山東于大谷在車師北去代一萬五百七十里本役屬車師

焉耆國在車師南都貢渠城白山南七十里漢時舊國也去代一萬二百里其王姓龍名鳩尸畢那即前涼張軌所討龍熙之胤所都城方二里國內凡有九城國小人貧無綱紀法令兵有弓刀甲稍婚姻略同華夏死亡者皆焚而後葬其服制滿七日則除之丈夫並翦髮以爲首飾文字與婆羅門同俗事天神並崇信佛法也尤重二月八日四月八日是日也其國咸依釋教齋戒行道焉氣候寒土地良

沃穀有稻粟菽麥畜有馳馬養蠶不以爲絲唯充綿續俗
尚蒲桃酒兼愛音樂南去海十餘里有魚鹽蒲葦之饒東
去高昌九百里西去龜茲九百里皆沙磧東南去瓜州二
千二百里恃地多嶮頗剽劫中國使太武怒之詔成周公
萬度歸討之約齎輕糧取食路次度歸入焉耆東界擊其邊
守左迴尉犁二城拔之進軍圍負渠鳩尸畢郝以四五萬
人出城守險以距度歸募壯勇短兵直往衝鳩尸畢郝衆
大潰盡虜之單騎走入山中度歸進屠其城四鄙諸戎皆
降服焉耆爲國斗絕一隅不亂日久獲其珍奇異翫殊方
諸詭難識之物橐駝馬牛雜畜巨萬時太武幸陰山北宮

度歸破焉耆露板至帝省訖賜司徒崔浩書曰萬度歸以
五千騎經萬餘里拔焉耆三城獲其珍奇異物及諸委積
不可勝數自古帝王雖云即序西戎有如指注不能控引
也朕今手把而有之如何浩上書稱美遂命度歸鎮撫其
人初鳩尸畢郝走山中猶覲城不拔得還其國既見盡爲
度歸所剋乃奔龜茲龜茲以其壻厚待之周保定四年其
王遣使獻名馬隋大業中其王龍突騎支遣使貢方物是
時其國勝兵千餘人而已

龜茲國在尉犁西北白山之南一百七十里都延城漢時
舊國也去代一萬二百八十里其王姓白即後涼呂光所

立白震之後其王頭繫絲帶垂之於後坐金師子床所居
城方五六里其刑法殺人者死劫賊則斷其一臂并刖一
足賦稅準地徵租無田者則稅銀風俗婚姻喪葬物產與
焉耆略同唯氣候少溫爲異又出細氊饒銅鐵鉛麋皮氍
毹沙鹽綠雌黃胡粉安息香良馬羣牛等東有輪臺卽漢
貳師將軍李廣利所屠者其南三百里有大河東流號計
戍水卽黃河也東去焉耆九百里南去于闐一千四百里
西去疏勒一千五百里北去突厥牙六百餘里東南去瓜
州三百里其東關城戍寇竊非一太武詔萬度歸率騎一
千以擊之龜茲遣烏羯目提等領兵三千距戰度歸擊走

之斬二百餘級大獲駝馬而還俗性多嫖置女市收男子
鐵以八官土多孔雀群飛山谷間人取而食之葦乳如雞
鷄其王家恒有千餘隻云其國西北大山中有如膏者流
出成川行數里入地狀如飴餠甚臭服之髮齒已落者能
令更生瘡人服之皆愈自後每使朝貢周保定元年其王
遣使來獻隋大業中其王白蘇尼啞遣使朝貢方物是時
其國勝兵可數千人

姑默國居南城在龜茲西去代一萬五百里役屬龜茲

溫宿國居溫宿城在姑默西北去代一萬五百五十里役
屬龜茲

龜茲

尉頭國居尉頭城在溫宿北去代一萬六百五十里役屬烏孫國居赤谷城在龜茲西北去代一萬八十里其國數爲蠕蠕所侵西徙葱嶺山中無城郭隨畜牧逐水草太延三年遣使者董琬等使其國後每使朝貢

疏勒國在姑默西白山南百餘里漢時舊國也去代一萬一千二百五十里文成末其王遣使送釋迦牟尼佛袈裟一長二丈餘帝以審是佛衣應有靈異遂燒之以驗虛實置於猛火之上經日不然觀者莫不悚駭心形俱肅其王戴金師子冠土多稻粟麻麥銅鐵錫雌黃每歲常供送於

突厥其都城方五里國內有大城十二小城數十人手足
皆六指產子非六指者即不育勝兵者二千人南有黃河
西帶葱嶺東去龜茲千五百里西去鎊汗國千里南去朱
俱波八九百里東北至突厥牙千餘里東南去瓜州四千
六百里

悅般國在烏孫西北去代一萬九百三十里其先匈奴北
單于之部落也爲漢車騎將軍竇憲所逐北單于度金微
山西走康居其羸弱不能去者住龜茲北地方數千里衆
可二十餘萬涼州人猶謂之單于王其風俗言語與高車
同而其人清潔於胡俗剪髮齊眉以飾飾塗之昱昱然光

澤日三澡漱然後飲食其國南界有大山山傍石皆焦鎔
流地數十里乃凝堅人取以爲藥即石流黃也與蠕蠕結
好其王嘗將數千人入蠕蠕國欲與大檀相見入其界百
餘里見其部人不浣衣不綰髮不洗手婦人口舐器物王
謂其從臣曰汝曹誑我將我入此狗國中乃馳還大檀遣
騎追之不及自是相仇讎數相征討真君九年遣使朝獻
并送幻人稱能割人喉脉令斷擊人頭令骨陷皆血出或
數升或盈斗以草藥內其口中令嚼咽之須臾血止養瘡
一月復常又無痕瘢世疑其虛乃取死罪囚試之皆驗云
中國諸名山皆有此草乃使人受其術而厚遇之又言其

國有大術者蠕蠕來抄掠術人能作霖雨育風大雪及行
潦蠕蠕凍死漂亡者十二三是歲再遣使朝貢求與官軍
東西齊契討蠕蠕太武嘉其意命中外諸軍戒嚴以淮南
王他爲前鋒襲蠕蠕仍詔有司以其鼓舞之節施於樂府
自後每使朝貢

者至拔國都者至拔城在疏勒西去代一萬一千六百二
十里其國東有潘賀那山出美鐵及師子

迷密國都迷密城在者至拔西去代一萬二千一百里正
平元年遣使獻一峯黑橐駝其國東有山名郁悉滿山出
金玉亦多鐵

悉萬斤國都悉萬斤城在悉密西去代一萬二千七百二十里其國南有山名伽色那山出師子每使朝貢

怛密國都怛密城在悉萬斤西去代二萬二千八百二十八里

洛那國故大宛國也都貴山城在疏勒西北去代萬四千四百五十里太和三年遣使獻汗血馬自此每使朝貢

粟特國在葱嶺之西故之奄蔡一名溫那沙居於大澤在康居西北去代一萬六千里先是匈奴殺其王而有其國至王忽倪已三世矣其國商人先多詣涼土販貨及魏克姑臧悉見虜文成初粟特王遣使請贖之詔聽焉自後無

使朝獻周保定四年其王遣使貢方物

波斯國都宿利城在忸密西古條支國也去代二萬四千二百二十八里城方十里戶十餘萬河經其城中南流土地平正出金鋤石珊瑚琥珀車渠馬腦多大真珠頗梨瑠璃水精瑟瑟金剛火齊鑛鐵銅錫朱砂水銀綾錦疊毼氍毹毼毼赤麀皮及薰六鬱金蘇合青水等香胡椒薑撥石蜜千年棗香附子訶梨勒無食子鹽綠雌黃等物氣候暑熱家自藏冰地多沙磧引水溉灌其五穀及鳥獸等與中夏略同唯無稻及黍稷土出名馬大驢及駝往往有一日能行七百里者富室至有數千頭又出白象師子大鳥卵

有鳥形如橐駝有兩翼飛而不能高食草與肉亦能噉火
其王姓波氏名斯坐金羊牀戴金花冠衣錦袍織成帔飾
以真珠寶物其俗丈夫翦髮戴白皮帽貫頭衫兩箱近下
開之亦有巾帔緣以織成婦女服大衫披大帔其髮前爲
髻後披之飾以金銀花仍貫五色珠絡之於膊王於其國
內別有小牙十餘所猶中國之離宮也每年四月出遊處
之十月仍還王即位以後擇諸子內賢者密書其名封之
於庫諸子及大臣莫之知也王死衆乃共發書視之其封
內有名者即立以爲王餘子出各就邊任兄弟更不相見
也國人號王曰鑿噴妃曰防步率王之諸子曰殺野大官

有摸胡壇掌國內獄訟泥忽汗掌庫藏開禁地早掌文書
及衆務次有遏羅訶地掌主之內事薛波敦掌四方兵馬
其下皆有屬官分統其事兵有甲稍圓排劍弩弓箭戰兼
乘象百人隨之其刑法重罪懸諸竿上射殺之次則繫獄
新王立乃釋之輕罪則劓削若髡或翦半鬚及繫牌於項
以爲耻辱犯強盜繫之終身姦貴人妻者男子流婦人割
其耳鼻賦稅則準地輸銀錢俗事火神天神文字與胡書
異多以姊妹爲妻妾自餘婚合亦不擇尊卑諸夷之中最
爲醜穢矣百姓女年十歲以上有姿貌者王收養之有功
勲人即以分賜死者多棄屍於山一月着服城外有人別

居唯知喪葬之事號為不淨人若入城市搖鈴自別以六月為歲首尤重七月七日十二月一日其日人庶以上各相命召設會作樂以極懽娛又每年正月二十日各祭其先死者神龜中其國遣使上書貢物云大國天子天之所生願日出處常為漢中天子波斯國王居和多千萬敬拜朝廷嘉納之自此每使朝獻恭帝二年其王又遣使獻方物隋煬帝時遣雲騎尉李昱使通波斯尋使隨昱貢方物伏盧屋國都伏盧尼城在波斯國北去代二萬七千三百二十里累石為城東有大河南流中有鳥其形似人亦有如橐駝馬者皆有翼常居水中出水便死城北有云屋山

出銀珊瑚琥珀多師子

色知顯國都色知顯城在悉萬斤西北去代一萬二千九百四十里土平多五果

伽色居國都伽色居城在悉萬斤南去代一萬二千九百里土出赤鹽多五果

薄知國都薄知城在伽色居國南去代一萬三千三百二十里多五果

牟知國都牟知城在忸密西南去代二萬二千九百二十里土平禽獸草木類中國

阿弗太汗國都阿弗太汗城在忸密西去代二萬三千七

百二十里土平多五果

呼似密國都呼似密城在阿弗太汗西去代二萬四千七
百里土平出銀琥珀有師子多五果

諾色波羅國都波羅城在忸密南去代二萬三千四百二
十八里土平宜稻麥多多五果

早伽至國都早伽至城在忸密西去代二萬三千七百二
十八里土平少田殖取稻麥於隣國有五果

伽不單國都伽不單城在悉萬斤西北去代一萬二千七
百八十里土平宜稻麥有五果

者舌國故康居國在破洛解西北去代一萬五千四百五

十里太延三年遣使朝貢不絕

伽倍國故休密訶侯都和墨城在莎車西去代一萬三千里人居山谷間

折薛莫孫國故雙靡訶侯都雙靡城在伽倍西去代一萬三千五百里居山谷間

鉗敦國故貴霸訶侯都護澡城在折薛莫孫西去代一萬三千五百六十里居山谷間

弗敵沙國故朐頓訶侯都薄茹在鉗敦西去代一萬三千六百六十里居山谷間

閼浮謁國故高附訶侯都高附城在弗敵沙南去代一萬

三千七百六十里居山谷間

大月氏國都騰監氏城在弗敵沙西去代一萬四千五百里北與蠕蠕接數爲所侵遂西徙都薄羅城去弗敵沙二千一百里其王寄多羅勇武遂興師越大山南侵北天竺自乾陀羅以北五國盡役屬之太武時其國人商販京師自云能鑄石爲五色瑠璃於是採礦山中於京師鑄之既成光澤乃美於西方來者乃詔爲行殿容百餘人光色映徹觀者見之莫不驚駭以爲神明所作自此國中瑠璃遂賤人不復珍之

安息國在葱嶺西都蔚搜城北與康居西與波斯相接在

大月氏西北去代二萬一千五百里周天和二年其王遣使朝獻

條支國在安息西去代二萬九千四百里

大秦國一名犁軒都安都城從條支西渡海曲一萬里去代三萬九千四百里其海灣出猶渤海也而東西與渤海相連蓋自然之理地方六千里居兩海之間其地平正人居星布其都王城分爲五城各方五里周六十里王居中城城置八臣以主四方而王城亦置八臣分主四城若謀國事及四方有不決者則四城之臣集議所王自聽之然後施行王三年一出觀風化人有冤枉詣王訴訟者當方

之臣小則讓責大則黜退令其舉賢人以代之其人端正
長大衣服車旗擬儀中國故外域謂之大秦其土宜五穀
桑麻人務蠶田多瑱琳琅玕神龜白馬朱鬣明珠夜光璧
東南通交趾又水道通益州永昌郡多出異物大秦西海
水之西有河河西南流河西有南北山山西有赤水西有
白玉山玉山西有西王母山玉爲堂室云徙安息西界循
海曲亦至大秦迴萬餘里於彼國觀日月星辰無異中國
而前史云條支西行百里日入處失之遠矣

阿鈎羗國在莎車西南去代一萬三千里國西有懸度山
其間四百里中往往有棧道下臨不測之深人行以繩索

相持而度因以名之土有五穀諸果市用錢爲貨止立宮
室有兵器土出金珠

波路國在阿鈎羗西北去代一萬三千九百里其地濕熱
有蜀馬土平物產國俗與阿鈎羗同類焉

小月氏國都富樓沙城其王本大月氏王寄多羅子也寄
多羅爲匈奴所逐西徙後令其子守此城因號小月氏焉
在波路西南去代一萬六千六百里先居西平張掖之間
被服頗與羌同其俗以金銀錢爲貨隨畜牧移徙亦類匈
奴其城東十里有佛塔周三百五十步高八十丈自佛塔
初建計至武定八年八百四十二年所謂百丈佛圖也

尉賓國都善見城在波路西南去代一萬四千二百里居在四山中其地東西八百里南北三百里地平溫和有苜蓿雜草奇木檀槐梓竹種五穀糞園田地濕生稻冬食生菜其人工巧雕文刻鏤織罽有金銀銅錫以爲器物市用錢他畜諸國同每使朝獻

吐呼羅國去代一萬二千里東至范陽國西至悉萬斤國中間相去二千里南至連山不知名北至波斯國中間相去一萬里薄提城周匝六十里城南有西流大水名漢樓河土宜五穀有好馬馳騾其王曾遣使朝貢

副貸國去代一萬七千里東至阿富汗使且國西至沒誰國

三百九十五
中問相去一千里南有連山不知名北至奇沙國相去一
千五百里國中有副貨城周匝七十里宜五穀蒲桃唯有
馬馳騾國王有黃金殿殿下有金駝七頭各高三尺其王
遣使朝貢

南天竺國去代三萬一千五百里有伏醜城周匝十里城
中山摩尼珠珊瑚城東三百里有拔賴城城中出黃金白
真檀石蜜蒲桃土宜五穀宣武時其國王婆羅化遣使獻
駿馬金銀自此每使朝貢

疊伏羅國去代三萬一千里國中有勿悉城城北有鹽奇
水西流有白象并有阿末黎木皮中織作布土宜五穀宣

武時其國王伏施末多遣使獻方物自是每使朝貢

拔豆國去代五萬一千里東至多勿當國西至旃那國中
間相去七百五十里南至罽陵伽國北至弗那伏且國中
間相去九百里國中出金銀雜寶白象水牛犛牛蒲桃五
果土宜五穀

嚧達國大月氏之種類也亦曰高車之別種其原出於塞
北自金山而南在于闐之西都烏許水南二百餘里去長
安一萬一百里其王都拔底延城蓋王舍城也其城方千
里餘多手塔皆飾以金風俗與突厥略同其俗兄弟共一
妻夫無兄弟者妻戴一角帽若有兄弟者依其多少之數

更加帽焉衣服類加以纓絡頭皆翦髮其語與蠕蠕高車
及諸胡不同衆可有十萬無城邑依隨水草以氈爲屋夏
遷涼土冬逐暖處分其諸妻各在別所相去或二百三百
里其王巡歷而行每月一處冬寒之時三月不徙王位不
必傳子子弟堪者死便受之其國無車有輿多馳馬用刑
嚴急偷盜無多少皆要斬盜一責十死者富家累石爲藏
貧者掘地而埋隨身諸物皆置塚內其人凶悍能鬪戰西
域康居于闐沙勒安息及諸小國三十許皆役屬之號爲
大國與蠕蠕婚姻自太安以後每遣使朝貢正光末遣貢
師子一至高平遇万俟醜奴反因留之醜奴平送京師求

熙以後朝獻遂絕初熙平中明帝遣騰伏子統宋雲沙門
法力等使西域訪求佛經時有沙門慧生者亦與俱行正
光中還慧生所經諸國不能知其本末及山川里數蓋舉
其略云至大統十二年遣使獻其方物廢帝二年周明帝
二年竝遣使來獻後為突厥所破部落分散職貢遂絕至
隋大業中又遣使朝貢方物其國去漕國千五百里東去
瓜州六千五百里

朱居國在干闥西其人山居有麥多林果盛事佛語與于
闐相類役屬龜噠

渴槃陀國在葱嶺東朱駒波西河經其國東北流有高山

三百七十四
夏積霜雪亦事佛道附於嘯噓

鉢和國在渴槃陀西其土尤寒人畜同居穴地而處又有
太雪山望若銀峯其人唯食餅麩飲麥酒服氍毹有二三
一道西行向嘯噓一道西南趣烏長亦爲嘯噓所統

波知國在鉢和西南土狹人貧依託山谷其王不能撫攝
有三池傳云大池有龍王次者有龍婦小者有龍子行人
經之設祭乃得過不祭多遇風雪之困

賒彌國在波知之南山居不信佛法專事諸神亦附嘯噓
東有鉢盧勒國路峻緣鐵瑣而度下不見底熙平中宋雲
等竟不能達

烏菴國在賒彌南北有葱嶺南至天竺婆羅門胡為其上
族婆羅門多解天文吉凶之數其主動則訪決焉土多林
果引水灌田豐稻麥事佛多諸寺塔極華麗人有爭訴服
之以樂曲者發狂直者無恙為法不殺犯死罪唯徙於靈
山西南有檀特山上立寺以驢數頭運食山下無人控
御自知往來也

乾陀國在烏菴西本名業波為噉啖所破因改焉其王本
是敕勒臨國已二世矣好征戰與罽賓闐三年不罷人怨
苦之有關象七百頭十人乘一象皆執兵仗象鼻縛刀以
戰所都城東南七里有佛塔高七十丈周三百步即謂雀

四百六十五
離佛圖也

康國者康居之後也遷徙無常不怕故地自漢以來相承
不絕其王本姓溫月氏人也舊居祁連山北昭武城因被
匈奴所破西踰葱嶺遂有國枝庶各分王故康國左右諸
國竝以昭武為姓示不忘本也王字甘夫畢為人寬厚甚
得衆心其妻突厥達度可汗女也都於薩寶水上阿祿迪
城多人居大臣三人共掌國事其王素冠七寶花衣綾羅
錦繡白疊其妻有髮幪以白巾丈夫翦髮錦袍名為彊國
西域諸國多歸之米國史國曹國何國小安國那色波國
烏那曷國穆國皆歸附之有胡律置於祆祠將決罰則取

而斷之重者族次罪者死賊盜截其足人皆深目高鼻多
髯善商賈諸夷交易多湊其國有大小鼓琵琶五絃箏篪
婚姻喪制與突厥同國立祖廟以六月祭之諸國皆助祭
奉佛爲胡書氣候溫宜五穀勤修園蔬樹木滋茂出馬駝
驢犂牛黃金硃沙麝香阿薩那香瑟瑟麁皮氍毹錦氍毹
蒲桃酒富家或致千石連年不敗大業中始遣使貢方物
後遂絕焉

安國漢時安息國也王姓昭武氏與康國王同族字設力
妻康國王女也都在那密水南城有五重環以流水宮殿
皆平頭王坐金駝座高七八尺每聽政與妻相對大臣三

人評理國事風俗同於康居唯妻其姊妹及母子遞相禽獸此爲異也隋煬帝即位遣司隸從事杜行滿使西域至其國得五色鹽而返國西百餘里有畢國可千餘家其國無君長安國統之大業五年遣使貢獻

石國居於藥殺水都城方十餘里其王姓石名涅國城東南立屋置座於中正月六日以王父母燒餘之骨金甕盛置牀上巡遶而行散以花香雜果王率臣下設祭焉禮終王與夫人出就別帳臣下以次列坐享宴而罷有粟麥多良馬其俗善戰曾貳於突厥射匱可汗滅之令特勒旬職攝其國事南去鎊汗六百里東南去瓜州六千里旬職以

隋大業五年遣使朝貢後不復至

女國在葱嶺南其國世以女爲王姓蘇毗字末羯在位二十年女王夫號曰金聚不知政事國內丈夫唯以征伐爲務山上爲城方五六里人有萬家主居九層之樓侍女數百人五日一聽朝復有小女王共知國政其俗婦人輕丈夫而性不妬忌男女皆以彩色塗面而一日中或數度變改之人皆被髮以皮爲鞋課稅無常氣候多寒以射獵爲業出鎗石朱砂麝香犛牛駿馬蜀馬尤多鹽恒將鹽向天竺興販其利數倍亦數與天竺党項戰爭其女王死國中厚歛金錢求死者族中之賢女三人一爲女王次爲小王

其人死剥皮以金屑和骨肉置瓶中埋之經一年又以其
皮肉鐵器埋之俗事阿脩羅神又有樹神歲初以人祭或
用獼猴祭畢入山祝之有一鳥如雌雉來集掌上破其腹
視之有衆粟則年豐沙石則有災謂之鳥卜隋開皇六年
遣使朝貢後遂絕

發汗國都葱嶺之西五百餘里古渠搜國也王姓昭武字
阿利朮都城方四里勝兵數千人王坐金羊牀妻戴金花
俗多朱砂金鐵東去疏勒千里西去蘇對沙那國五百里
西北去石國五百里東北去突厥可汗一千餘里東去瓜
州五千五百里隋大業中遣使貢方物

吐火羅國都葱嶺西五百里與挹怛雜居都城方二里勝
兵者十萬人皆善戰其俗奉佛兄弟同一妻送寢焉每一
人入房戶外挂其衣以為志生子屬其長兄其山穴中有
神馬每歲牧馬於穴所必產名駒南去漕國千七百里東
去瓜州五千八百里大業中遣使朝貢

米國都那密水西舊康居之地無王其城主姓昭武康國
王之支庶字閉拙都城方二里勝兵數百人西北去蘇對
沙那國五百里西南去史國二百里東去瓜州六千四百
里大業中頻貢方物

史國都獨莫水南十里舊康居之地也其王姓昭武字狄

遮亦康國王之支庶也都城方二里勝兵餘人俗同康國北去康國二百四十里南去吐火羅五百里西去那色波國二百里北去米國二百里東北去米國二百里東去瓜州六千五百里大業中遣使貢方物

曹國都那密水南數里舊是康居之地也國無主康國王令子烏建領之都城方三里勝兵千餘人國中有得悉神自西海以東諸國竝敬事之其神有金人破羅濶人丈有五尺高下相稱每日以駝五頭馬十匹羊一百口祭之常有數千人食之不盡東南去康國百里西去何國百五十里東去瓜州六千六百里大業中遣使貢方物

何國都那密水南數里舊是康居地也其王姓昭武亦康
國王之族類字敦都城方二里勝兵者千人其王坐金羊
座東去曹國百五十里西去小女國三百里東去瓜州六
千七百五十里大業中遣使貢方物

烏那遏國都烏澹水西舊安息之地也王姓昭武亦康國
王種類字佛食都城方二里勝兵數百人王坐金羊座東
北去安國四百里西北去穆國二百餘里東去瓜州七十
五里大業中遣使貢方物

穆國都烏澹河之西亦安息之故地與烏那遏爲隣其王
姓昭武亦康國王之種類也字阿濫密都城方二里勝兵

二千人東北去安國五百里東去烏那遏二百餘里西去波斯國四千餘里東去瓜州七百里大業中遣使貢方物漕國在葱嶺之北漢時罽賓國也其王姓昭武字順達康國王之宗族也都城方四里勝兵者萬餘人國法嚴殺人及賊盜皆死其俗重淫祠葱嶺山有順天神者儀制極華金銀鍍爲屋以銀爲地祠者日有千餘人祠前有一魚脊骨有孔中通馬騎出入國王戴金牛頭冠坐金馬座多稻粟豆麥饒象馬犂牛金銀鑲鐵毼朱沙青黛安息青木等香石蜜黑鹽阿魏沒藥白附子北去帆延七百里東去剗國六百里東北去瓜州六千六百里大業中遣使貢方

物

論曰自古開遠夷通絕域必因宏放之主皆起好事之臣
張騫鑿空於前班超投筆於後或結之以重寶或懾之以
利劍投軀萬死之地以要一旦之功皆由主尚來遠之名
臣徇輕生之節是知上之所好下必効焉西域雖通於魏
氏于時中原始平天子方以混一爲心未遑及此其信使
往來得羈縻勿絕之道及隋煬帝規摹宏侈掩吞秦漢裴
矩方進西域圖記以蕩其心故萬乘親出玉門關置伊吾
且末鎮而關右暨於流沙騷然無聊生矣若使北狄無虞
東夷告捷必將修輪臺之戍築烏壘之城求大秦之明珠

致條支之鳥卵往來轉輸將何以堪其弊哉古者哲王之制也方五千里務安諸夏不事要荒豈威不能加德不能被蓋不以四夷勞中國不以無用害有用也是以秦戍五嶺漢事三邊或道殣相望或戶口減半隋室恃其強盛亦狼狽於青海此皆一人失其道故億兆罹其苦載思即叙之義固辭都護之請返其千里之馬不求白狼之貢則七戎九夷候風重譯雖無遼東之捷豈及江都之禍乎案西域開於往漢年世積久雖離併多端見聞殊說此所以前書後史踳駁不同豈其好異地遠故也人之所知未若其所不知信矣但可取其梗槩夫何是非其間哉

卷終